

## Sepinien xa diamu te Revelesen

*?Visi iaxa tetis uvei ak?*

Moletin xa tetis uvei ak, hisen tehe Sion<sup>☆</sup> xa tehe eloheoh tei na Iesu Kristo. Xi tehe Sion Sepeti xa tetis “Longeongen hos usil Iesu Kristo xa Sion tetisi,” tetel 1, 2, e 3 Sion mun. E melele nen ak, sangas ni huras 95 AD (huras xil xa tetutou ni poten na Iesu), kavmen te hal Rom teling Sion tete aelan tei xa hokorong xa latekesi ni Patmos. E latehiteni mini xa lihas vini xosxa isak pisi tangan ilesae reling aelan ak.

*?Visi iaxa tevuli uvei ak tetiamu?*

Sion tetis uvei ak teha mi Kristin xil te sias lu e he sav (7) xa mahulong te provins te hal Esia (xa lakesi ni Turkey xosali), e teha mi Kristin sav xil mun te rute xil vus. Texoni Sion, Kristin xil di latehisu ni melele te xeih xil e rute xil vus xa suv toto tol (3) te hal Rom di lattelaxati: Nero (54-68 AD), Vespasian (69-79 AD), e Domisian (81-96 AD). Misak ni, Iesu tesa metuveen xil mi Sion tangan vahit mesen ni mi Kristin xil xa melele te xeih savsav xil ti imei, tangan vapet rat nenemien nae xa Iesu Kristo ileli Temat e holesok xil xa misa te ut etan, ma ti lisoh ixeh e vaeen te neketen xa lateti en.

*?Sion tetis uvei ak veneh?*

Iesu Kristo tesemae ni Sion tangan vatis uvei ak ha vatutou ni neketen na moletin nan xil - Iesu Kristo testal mi Sion texo metuveen xil e tesemae ni tangan vatis xat holesok xil xa tehiti lenen ni mini tangan, ti, isa ni iha mi Kristin xil tangan likila.<sup>☆</sup>

---

☆ :: Rev 1:1,4,9; 22:8    ☆ :: Rev 1:11,19; 22:6

Sion ien tehei tangan vassel xat Kristin xil te tan xa mahulong te hal Esia xa neketen nae itin tang ita e namerir ti - Vengan huram holu mei tetavi, Kristin xil holu neketen nae temerir.✧ Tesak ni, Sion tetis selxatien xil ak teha mi sias xil kekes xa lateti e tan xa mahulong te hal Esia tangan neketen nae itin tang ita.✧

Sion ien tehei tangan Kristin xil lakil kuhi xa Hi be eilep mak mu mili holesok xil - Kristin xil holu di latelong pangas xil ve melele te xeih xil xa di latehisu ni texo he kavmen, texo he moletin sav xil, e texo Siu e rut Kristin xil mun.✧ Tesak ni, Sion tehit lelen ni xa holesok xil vus xa di testal mi xil di tehusil xat naha xa Hi teling xati tetiamu ni melele xa tepeas ni ut etan tangan mei istal.✧

Sion ien tehei tangan Kristin xil likil kuhi xa Iesu imei rilomun e ihas tan ni Temat e holesok xil vus xa lasa - Kristin xil holu di latepusi texoni ngan xa di latetatil mei rilomunen na Iesu huram xil holu ngamu e Kristin xil holu tetel eloheoh xil mun latelel ngamu ve neketen nae.✧ E Sion tepet rat nenemien nae tehit Iesu imei rilomun reitin e ihas tan ni Temat e holesok xil vus xa lasa, e iling pilei holesok xil vus mei ihos.✧

Sion ien tehei tangan vassel xat Kristin xil xa lisoh ixeh e neketen nae tangan linave unoun ti e melele xa Iesu imei rilomun en - Rut Kristin xil latepusi xa holesok xil xa di latehisu ni texeh tova tang.✧ Tesak ni, Sion tesel xat xil tangan tit lisoh ixeh vehakut e neketen nae e linamaen nenesien nae ti e Hi namot.✧ Xi tesel xat xil tangan linapol ni ti neta xil xa nasak ni xil linahe unoun ven e melele xa Iesu imei rilomun e ilepis rin na moletin xil.✧

---

✧ :: Rev 2:4,14,20; 3:2,15    ✧ :: Rev 2:1-3:22    ✧ :: Rev 2:7,9-10,13,19,26;  
3:5,21    ✧ :: Rev 1:8,17; 4:1-22:21    ✧ :: Rev 1:9    ✧ :: Rev 1:10-20;  
19:11-21    ✧ :: Rev 6:9-11    ✧ :: Rev 2:7,11,17,26; 3:5,12,21; 7:14; 12:11;  
15:2    ✧ :: Rev 3:18; 12:11; 16:15

Sion ien tehei tangan vaped rat nenemien na Kristin xil usil naha xa istal e melele xa Hi ipol pilei ni ut etan e tilang hat, e isak ni xalu mei lalihe neta hu - Rut Kristin xil di lanem holu usil holesok xil te ut etan. Ma Sion tesel xat xil tangan nenemien nae iti e Hi kestang e melele xa ipol pilei ni ut etan itel tilang hat mei lalihe neta hu.☆

*Nenemien tei xa eilep te uvei ak de Revelesen 1:10-11, 19*

E Sande xa be melengien eo na Suv Iesu, Ninin na Hi mei mise xat nou e nalong rae tei nggo petouk xa misel nggeih nggoni amaru tei. Xi biteni minou bit, “Utis rat naha xa ti upusi ihe vanuvei tei, e usa ni iha mi sias xil xa labe lu e he sav (7) te taon xil ak: Efeses, Samerna, Pegamam, Taeatira, Sadis, Piladelfia, e Laodisia ...

“Utis xat *naha xa otepusi ngamu, naha xa di mistal taxeak*, itel *naha xa istal e melengien xil xa ti imei itutou.*”

*?Naha iaxa di e sepinien ak?*

1. “*Naha xa otepusi ngamu ...*” - Tetep iaxa Iesu Kristo tesepin mi Sion texo metuveen tei. (1:1-20)
2. “*... naha xa di mistal taxeak ...*” - Selxatien xil teha mi sias lu e he sav (7) xa lateti e tan xa mahulong te hal Esia. (2:1-3:22)
3. “*... naha xa istal e melengien xil xa ti imei itutou.*”
  - a. Holesok xil te ut etan lames Hi. (4:1-11)
  - b. Iesu pisen ni xa xi nggoni sulut sipsip te sanien eo xa pipin tangan vavuli sepinien xa Hi di bit lelen ni. (5:1-14)
  - c. Iesu bul papas siil be tei e he sav (6) xa misak ni longpangasien xil lastal lapangei moletin xil te ut etan. (6:1-7:17)
  - d. Vatixar lu e he sav (7) na masxaxa xil labui amaru nae xa misak ni longpangasien xil lastal lapangei moletin xil te ut etan. (8:1-16:21)

- e. Hi misa pangasien mi ngan xil te hal Babilon. (17:1-19:5)
  - f. Iesu bemei rilomun tangan vahas tan ni Temat e holesok xil vus xa di langgusili. (19:6-21)
  - g. Iesu del ngan xil xa langgusili lalaxat ut etan duxoh huram taosen tei. (20:1-6)
  - h. Hi miso Temat be Von Upang. (20:7-10)
  - i. Hi dotan e von koten nan e milepis rin na moletin xil vus. (20:11-15)
  - j. Hi misak ni ut etan e tilang hat mei lube neta hu. (21:1-22:5)
4. Sepinien kor. (22:6-21)

*Sepkilaen na Sion usil uvei ak*

<sup>1</sup> Ngan ak be naha xa Hi tesa ni mi Iesu Kristo tangan ipisen ni mi eloheoh nan xil usil naha xa mei istal nave nousav ti. E Iesu Kristo tesil masxaxa nan temei minou, eloheoh nan tei, tangan vahit mesen sepinien ak minou. Hisok Sion. ☆ <sup>2</sup> E holesok xil ngasen xa natepusi e nateteong ni usil naha xa Hi tehit kila, xa Iesu tehit mesen ni minou be reitin. Ngan ak vari iaxa di nadis usili xiak. ☆ <sup>3</sup> E tuxolxatien na Hi iti mi moletin xa ti ivuli uvei ak, e tuxolxatien iti mi ngan xil mun xa lalong kil sepinien te kilakilen ak e lalong xat naha xa di en. Vengan xa melele tangan holesok xil ak mei istal ihe reitin di bemei sangas. ☆

*Selxatien xil xa ba mi sias lu e he sav (7) xa ladi e tan xa mahulong te hal Esia*

---

☆ 1:1: Dan 2:28,29,45; Rev 1:19; 22:6    ☆ 1:2: Rev 1:9; 6:9    ☆ 1:3: Rev 22:7; 22:10

<sup>4</sup> Inou, Sion di nadis sepinien ak bat mi xamim, sias xil xa mube lu e he sav (7) xa mudi e tan xa mahulong te hal Esia.\* ☆

Hi xa da taxeak, teta tetiamu, e ita tang e melengien xil xa ti imei. E nasis mini tangan eheien hos e tomat nan iti mi xamim. E di misa xalu mi xir nggo Ninin lu e he sav (7) nan xa langgoni laet lu e he sav (7) xa ladi pe meten xa di dotan de von xeihen nan. <sup>5</sup> Eheien hos e tomat ak lunggo Iesu Kristo mun xa rakila raling nenesien nar en. Xi bit kil reitinen usil naha xa Hi tepisen ni mini. Xi be muimol na ngan xil xa ti limea rilomun ra maten e be vat na suv xil vus te ut etan. ☆

Iesu ien bei xir, e ren xa mileh e maten nan misak ni xir rameluv ra pangasien te tesaen nar xil. <sup>6</sup> Xi pol ni xir mei rabe vanut moletin tei xa Hi be suv toto te meulien nar. Reitin, xi pol ni xir mei rabe vanut pris xil xa di rapol mi Hi Tamen. Ve rin ak, di rabithiteni xa Iesu Kristo be eilep pupu e xeihen te lelatatien nan iti vehakut xa vehakut tang. Reitin. ☆

<sup>7</sup> !Muteong kuhi! Xi imei istal ixo momah xil e moletin xil vus lipusi. Reitin, ngan xil mun xa latesal vini tetiamu ti lipusi. Isak ni moletin xil te ut xil vus te ut etan limeun itel ulikanen. Reitin, xi imei istal imak vari. ☆

<sup>8</sup> Hi Suv te xeihen xa da taxeak, teta tetiamu, e ita e melengien xil xa ti imei, xi di biteni bit, “E holesok xil vus xa di, inou nateta ngamu tetiamu ni xil, e nita mun itutou ni xil.” ☆

---

\* 1:4: Xosali lakes rute ak ni Turkey. ☆ 1:4: Eks 3:14; Rev 1:8; 4:8; 11:17; 16:5; Aes 41:4; Rev 3:1; 4:5; 5:6 ☆ 1:5: Rev 3:14; 19:11; Sam 89:27; Kol 1:18; Sam 89:27; Rev 19:16; Sam 130:8; Aes 40:2 ☆ 1:6: Eks 19:6; Aes 61:6; 1Pit 2:5,9; Rev 5:10; 20:6 ☆ 1:7: Dan 7:13; Mat 24:30; Mak 13:26; Luk 21:27; 1Tes 4:17; Sak 12:10; Sion 19:34,37; Sak 12:10,12,14; Mat 24:30 ☆ 1:8: Rev 21:6; 22:13; Eks 3:14; Rev 1:4; 4:8; 11:17; 16:5,7,14; Aes 41:4; Amos 3:13; 4:13; Rev 15:3; 19:6,15; 21:22

*Iesu Kristo bemei visual Sion e pisen holesok xil holu mini*

<sup>9</sup> Inou nabe Sion, tua namim ve nenesien nar e Iesu Kristo tei takes. Nggoni xamim, inou mun di nanggur longpangasien te sakpurunien xil del nenemien xa teviei e melele xa di nadatil melengien xa lelatatien na Hi mei istal en. Lateso nou nabe nim te xeih e tutut aelan te hal Patmos vengan xa di nabithiten naha xa Hi di pisen ni minou e reitinen usil Iesu Kristo mi moletin xil. <sup>10</sup> E Sande xa be melengien eo na Suv Iesu, Ninin na Hi mei mise xat nou e nalong rae tei nggo petouk xa misel nggeih nggoni amaru tei. <sup>11</sup> Xi biteni minou bit, “Utis rat naha xa ti upusi ihe vanuvei tei, e usa ni iha mi sias xil xa labe lu e he sav (7) te taon xil ak: Efeses, Samerna, Pegamam, Taeatira, Sadis, Piladelvia, e Laodisia.”

<sup>12</sup> Melele xa nabiles tangan napus ti visi iaxa di misepin minou, napus laet lu e he sav (7) xa lasomal ladi e lapol ni pos nen ni gol. <sup>13</sup> E hilaep te xil, napus ngan xa nggoni Nat Moletin xa tenben nggoni moletin tei xa nggo ut nesao. † Xi mising nggoni suv toto tei ni eising xa teviei xa ba duxoh len etan. E lasoxolen kaliko tei xa kala nen nggoni gol da xol valhasen. ✨ <sup>14</sup> Hilin mieh xa mieh e meten minehin pupu nggoni upang. ✨ <sup>15</sup> Kaelen minehin nggoni oei te venu ‡ e raen mirum nggeih nggoni melele xa tahe xa mahulong mei mavul xat vatihat xil. ✨ <sup>16</sup> E hen matu, xi nggur xat hitu lu e he sav (7), e tiei tei xa mikan e rin xalu vus mistal nggo vulongen. E valnaon minehin nggoni eai xa di minggan e piniae. ✨

---

† 1:13: Nat Moletin be ngan xa Dan 7:13 del Dan 10:5 di misepin usili xa imei e isak ni lelatatien na Hi mei istal. ✨ 1:13: Dan 7:13; 10:5; Esek 9:2,11

✨ 1:14: Dan 10:6; Rev 2:18; 19:12; Dut 7:9 ‡ 1:15: Sepinien xati teni bit, “bihili nggoni aean brons xa latelingi e upang.” ✨ 1:15: Esek 1:24; 43:2; Rev

14:2; 19:6 ✨ 1:16: Rev 1:20; 2:1; Aes 49:2; Rev 2:12,16; 19:15

<sup>17</sup> Melele xa napusi, namot nabe tan visal len e nasakras napol ni ti neta nggoni ngan xa namat. Di, xi miling hen matu e nou e biteni bit, “!Ulum nakan ti! Inou nateta tetiamu ni holesok xil vus xa ladi, e inou nihe hoxalite teni mun. ✧ <sup>18</sup> Inou nabe ngan xa nameul. Tave ti neta xa natemat, taxeak opusi xa di nameul tang nada, e nitat imak vehakut xa vehakut tang. De heok, naleh xat ki xil te maten e Hedis, rute xa nini moletin xil xa lalel laba ladi en. § <sup>19</sup> Utis xat naha xa otepusi ngamu, naha xa di mistal taxeak, itel naha xa istal e melengien xil xa ti imei itutou. ✧ <sup>20</sup> Koute te nenemien xusus usil hitu lu e he sav (7) xa di opusi ladi e heok matu be vole usil sias lu e he sav (7) te hal Esia. E laet lu e he sav (7) xil ak xa labe gol, xil labe vole usil masxaxa lu e he sav (7) xa di laketeh xol sias xil ak.” ✧

## 2

### *Selxatien ba mi sias te hal Efeses*

<sup>1</sup> Iesu biteni minou bit, “Utis sepinien ak iha mi masxaxa xa di miketeh xol sias te hal Efeses uhit: ✧

“Ngan ak be selxatien xa nggo visal ngan xa nggur xat hitu lu e he sav (7) di e hen matu e di mikakao e hilaep te laet lu e he sav (7) xa be gol. <sup>2</sup> Di napus kil polien te xeih namim e napus kila xa midep iaxa di mubisu ni melele te xeih xil del nenemien xa be teviei. Nakila xa di musin ngan xil xa di langgusil tesaen. E di mulepis rin na ngan xil xa labit labe eloheoh navan xil, e mupus kila xa labe moletin te luvosen xil tang. ✧ <sup>3</sup> Nakila xa di mubisu ni

---

✧ 1:17: Aes 44:6; 48:12; Rev 2:8; 22:13    § 1:18: King xil ak be vole tei xa bit Iesu nggur xeihen tangan vasak ni moletin xil lakila lameluv ra xeihen te maten, e Hedis be von maten.    ✧ 1:19: Aes 48:6; Dan 2:28,29,45; Rev 1:1; 22:6    ✧ 1:20: Rev 1:16; 2:1; 3:1    ✧ 2:1: Rev 1:16,20; 3:1    ✧ 2:2: Rev 3:1,8,15; 1Sion 4:1

melele te xeih xil del nenemien xa be teviei, e midep iaxa di munggur longpangasien xil holu ve hisok. E neta sav xa mak, di musokil e neketen namim, e vemim tavuol ti.

<sup>4</sup> “E ngan ak nangguri ba xat rin namim: taxeak, di mustokovein eheien xa mutepisen ni minou e mi moletin sav xil tetiamu. <sup>5</sup> Ma ihos xa munem xat sexien te eheien xa di mutepisen ni tetiamu, e mupus kila xa mudi sotin ranou xosali. Muhiles ra sexien tesa namim e mupol ni sexien hos xil ixoni ngan xa mutepol ni tetiamu. Xosxa munapol ni ti, ma nimeï visal xamim e nihur rat laet namim ihe reling voninen. ✧ <sup>6</sup> E ngan ak napusi xa mupol ni momal: iemim nggat sexien xil na ngan xil xa langgusil pispisien na Nikolai\* nggoni ngan taxa inou mun ieok di nggati. ✧

<sup>7</sup> “!Xosxa vurangemim di, ma muteong kuhi ni naha xa Ninin di biteni ba mi sias xil! E vaeen te neketen, ngan xil xa lasoh nggeih, nimaen xil lia huit vatiei te meulien sal xa di meul e naho na Hi.” ✧

### *Selxatien ba mi sias te hal Samerna*

<sup>8</sup> Di, Iesu bit rilomun ni minou bit, “Utis sepinien ak iha mi masxaxa xa di miketeh xol sias te hal Samerna uhit: ✧

“Ngan ak be selxatien na ngan xa be vatite te holesok xil vus xa ladi, e be hoxalite teni mun; ngan xa temat e temea rilomun ra maten. <sup>9</sup> Nakila xa di munggur longpangasien xil holu e holesok namim tovuol e ut etan vengan xa di munggusil xat inou. E, e rin te neketen namim, holesok namim be holu. Nakila xa vanut moletin tei xa labit labe Siu reitin di laseputut ni xamim. E inou napus xil nggoni

✧ 2:5: Rev 2:16,22; 3:3,19 \* 2:6: Nikolai di tepispisi mi moletin xil xa tenbe moletin e ninin xa da en, lusav. Mak, ma bit tesaen xil vus xa moletin

di pol ni del tenben misakras vapurun ninin xa da en. ✧ 2:6: Sam 139:21

✧ 2:7: Sen 2:9; 3:22,24; Rev 22:2,14; Sen 2:8; Esek 28:13; 31:8,9 ✧ 2:8: Aes 44:6; 48:12; Rev 1:17; 22:13

ngan xa latave Siu reitin ti. E-e, xil labe vanut moletin tei na Temat tang. ☆ <sup>10</sup> Ulimim nakan ni longpangasien xil ti xa sangas ti muhisu ni. !Muteong kuhi! Nave nousav ti, Temat isak ni rut xamim muhe nim te xeih tangan muvur sakpisien xil, e mulonge isa melengien ihe he xalu (10). E nenemien namim namot ti. Musoh ixeh venou, tave ti neta xa ti lisak purun xamim ha vuma ... rut xamim lilel. Imak, ma inou nisa huit neketen mi xamim xa be meulien sal. ☆

<sup>11</sup> “!Xosxa vurangemim di, ma muteong kuhi ni naha xa Ninin di biteni ba mi sias xil! E vaeen te neketen, ngan xil xa lasoh nggeih, xil linamat ti e maten xa be lu nen xa be te nousav.” ☆

*Selxatien ba mi sias te hal Pegamam*

<sup>12</sup> Di, Iesu bit rilomun ni minou bit, “Utis sepinien ak iha mi masxaxa xa di miketeh xol sias te hal Pegamam uhit: ☆

“Ngan ak be selxatien na ngan xa tiei xa mikan e rin xalu vus nggo vulongen. <sup>13</sup> Nakil rute xa xamim mudi en, e taon xa Temat di pol pupu e meulien na moletin xil en. Tave ti neta xa mak, e xamim di tamu mube reitin minou e mutastokovein neketen namim ti. Reitin, di musomal nggeih e rute xa Temat nggur xeihen en, e melengien xil mun xa latehas vin Antipas xa tehusil xat inou e vehakut tehithiten longeongen hos usil inou mi mosav xil.

<sup>14</sup> “E ngan ak nangguri ba xat rin namim: mumaen rut xamim di langgusil xat hisit pispisien xa nggoni pispisien na provet Balam tetiamu. Vengan xa xi tepispisi mi suv toto Balak xa tetep iaxa xi tetel mol-Isrel xil ba latemot e tesaen texo sexien xa latea anien xa latesa ni tuei teha

---

☆ 2:9: Tem 2:5; 2Kor 11:14,15; Rev 3:9 ☆ 2:10: Dan 1:12,14; Tem 1:12

☆ 2:11: Rev 20:14; 21:8 ☆ 2:12: Aes 49:2; Hib 4:12; Rev 1:16; 2:16; 19:5

mi nanao xil e latepol tesa mi atou xil. ☆ 15 E rut xamim mun di langgusil hisit sexien tesa xil ak melele xa di langgusil pispisien xil na Nikolai ☆ e pispisien sav xil mun xa langgoni. 16 !Mak iaxa, taxeak, muhiles ra tesaen namim xil! Xosxa munaviles ti ra pispisien xil ak, ma, nave nousav ti, inou nimei visal xamim e nivae iha xat xamim itel tiei xa mahulong xa di mistal nggo vulongok. ☆

17 “!Xosxa vurangemim di, ma muteong kuhi ni naha xa Ninin di biteni ba mi sias xil! E vaeen te neketen, ngan xil xa lasoh nggeih, nisa ti manna xa di minggus† mi xil. E nisa hat tei xa mieh mi xil kekes xa ladis hisexil hu di en, hisexil xa moletin sav xil linakil ti.” ☆

*Selxatien ba mi sias te hal Taeatira*

18 Di, Iesu bit rilomun ni minou bit, “Utis sepinien ak iha mi masxaxa xa di miketeh xol sias te hal Taeatira uhit: ☆

“Ngan ak be selxatien mi xamim xa nggo Nat Hi xa meten minehin pupu nggoni upang e kaelen minehin nggoni oei te venu. ☆ 19 Nakil naha xa xamim di mupol ni. Napus kil eheien namim, neketen namim, polien namim, e midep iaxa di mubisu ni melele te xeih xil del nenemien xa be teviei. E napus kila mun xa, xosali, di mupol holu mak mu mili holesok xil xa mutepol kokot ni e melele xa mutehur kokot ni neketen namim.

20 “E ngan ak nangguri di xat rin namim: di mumaen atou xa sexien nan nggoni Sesebel tetiamu tangan mei

---

☆ 2:14: Nam 31:16; 25:1-2; Siud 1:11 ☆ 2:15: Rev 2:6 ☆ 2:16: Rev 3:11; 22:7,12,20; Aes 49:2; Rev 1:16; 2:12; 19:15 † 2:17: Siu xil lanemi labit melele xa Hi isak ni lelxatien nan mei istal e ut etan, isa manna xa Mosis teling xuxus ni teti valite tei tangan moletin nan xil lia ni. ☆ 2:17: Sam 78:24; Aes 62:2; 65:15; Rev 3:12 ☆ 2:18: Dan 10:6; Rev 1:14-15; 19:12 ☆ 2:18: Rev 1:14-15

vamos e xamim. Xi di mikes tasen ni xi bit be provet tei na Hi. E pispisien nan di miluvos moletin te polien navan xil xa bos tang tangan ti lipol ni sexien te hoeasoen e ti lia anien xa latesa ni tuei teha mi nanao xil. ☆ 21 Inou natesa mesal mini tuei tangan vahiles ra tesaen nan xil, e xi ien ti tenavei tangan vahiles ra sexien te hoeasoen nan. 22 Muxuxou kuhi, vengon xa inou nisa mesien tei xa mahulong mi atou ak xa isak ni ita kat tang e rong man. E xosxa ngan xil xa lapol misa dela linaviles ti ra sexien nae xil, ma xil mun lilonge isa pupu itela. 23 Reitin, inou nihas vin moletin xil xa di langgusili. Isak ni, moletin xil te sias xil vus likila sung xa inou iaxa nakil naha xa di e nenemien e tin moletin xil vus, e nisak ni moletin xil kekes ti lia huit polien nae. ☆

24 “E xamim tesav xil te hal Taeatira, mutnahusil pispisien xil ak ti. Xamim mutesin pispisien ak xa mosav xil lakesi ni ‘kilakilen xil xa tellep na Temat.’ Ma, mi xamim, ninaling rae ti mun xa meas nata xat xamim. 25 Muhur xat rae xil kestang xa mutehuri tuei ituxoh melele xa nimeilomun en. ☆

26 “E vaeen te neketen, ngan xil xa lasoh nggeih e tit lipol ni polien navan xil ituxoh melele xa nimeilomun en, inou nisa xeihen mi xil tangan ti lilaxat kantri xil. ☆

27 “Reitin, nisa xeihen te lelatatien mi xil xa ixoni ngan xa Tata navan tesa ni minou, nggoni sepinien xa biteni bit, *‘Lelatatien nae ixeh mak mu.*

*Lihu len ngan xil vus xa ti livae itel xil,*

*ixoni ngan xa langgu papas valoei xil xa be kilas mei be saxute xil.’* (Sam 2:9)

---

☆ 2:20: 1King 16:31; 2King 9:22; Nam 25:1-2; Rev 2:14 ☆ 2:23: Sam 7:9; Pro 24:12; Ser 11:20; 17:10; Sam 62:12; Pro 24:12; Ser 17:10; Rom 2:6; 2Tim 4:14; Rev 18:6; 20:12,13 ☆ 2:25: Rev 3:11 ☆ 2:26: Sam 2:8,9; Rev 12:5

28 E nisa Melan mun mi xil xa be hitu te makoe. † ☆ 29 ! Xosxa vurangemim di, ma muteong kuhi ni naha xa Ninin di biteni ba mi sias xil!”

### 3

#### *Selxatien ba mi sias te hal Sadis*

<sup>1</sup> Iesu bit rilomun ni minou bit: “Utis sepinien ak iha mi masxaxa xa di miketeh xol sias te hal Sadis uhit: ☆

“Ngan ak be selxatien na ngan xa Ninin lu e he sav (7) na Hi di en xa langgoni laet lu e he sav (7) e xa nggur xat hitu lu e he sav (7).<sup>\*</sup> Nakil sen holesok xil xa di mupol ni. Tave ti neta xa moletin xil di lanemi labit neketen namim meul nggeih tang da, e inou nakila xa neketen namim mat. <sup>2</sup> !Mak, ma mutamea musoh! Musak ni neketen xa munggur xati tamu da mei ixeih pilei mu. Xosxa munapol ni ti namak, ma neketen namim ak imat vuol vari. Di nabiteni mak vengan xa nakameti xa di mupol ni neta tei xa tavos ti pe met Hi. <sup>3</sup> Mak, ma munem xat pispisien xil xa mutelonge e mutehur xati tuei. Muhiles ra tesaen namim xil e mulong xat pispisien xil ak. Xosxa di tamu mupat del neketen namim, ma nimeil rilomun e melengien tei xa xamim munakil ti ixoni moletin te kanen tei e nilepis rin namim. ☆

<sup>4</sup> “E xamim vahis te hal Sadis di langguxou kuhi tangan meulien nae nave muis ti nggoni ngan xa lasing ni eising xil xa memese tevi. Ngan xil ak kestang lapin pe met Hi tangan lising ni eising xa mieh e likakao itel nou. ☆ <sup>5</sup> Ngan

---

† 2:28: Hitu xa lakesi ni Melan di pili nggeih e melele xa sangas ut da miluv. Ngan ak be vole tei mi Kristin xil xa lisoh ixeih e maluxoluken te melele te xeih xil vengan xa laet te mei rilomunen na Iesu Kristo di bemei sangas.

☆ 2:28: Rev 22:16 ☆ 3:1: Rev 1:4; 4:5; 5:6; 1:16,20; 2:1; 2:2; 3:8,15 \* 3:1: Rev 1:20 di biteni xa hitu lu e he sav (7) be vole tei usil masxaxa lu e he sav (7). ☆ 3:3: Rev 2:5,16,22; 3:19; Mat 24:43-44; Luk 12:39-40; 1Tes 5:2,4; 2Pit

3:10; Rev 16:15 ☆ 3:4: Siud 1:23

xil mun xa lasoh nggeih e vaeen te neketen, xil lising ni eising xa mieh ixoni xil tang. Inou ninasu lelen hisxil ti ra Vanuvei te Meulien. E pe met Tata navan e masxaxa nan xil, inou nihit rati xa xil labe navan. ☆

<sup>6</sup> “!Xosxa vurangemim di, ma muteong kuhi ni naha xa Ninin di biteni ba mi sias xil!”

*Selxatien ba mi sias te hal Piladelvia*

<sup>7</sup> Di, Iesu bit rilomun ni minou bit, “Utis sepinien ak iha mi masxaxa xa di miketeh xol sias te hal Piladelvia uhit:

“Ngan ak be selxatien na ngan xa be eo e be reitin, ngan xa nggur xat ki te lelxatien na suv toto Deved tetiamu. *‘Melele xa xi misah puiteh, moletin tovuol mikila vakoe xole; e melele xa mikoe xole, moletin tovuol mikila vasaha.’* (Aes 22:22) ☆

<sup>8</sup> “Nakil naha xa di mupol ni. Tave ti neta xa mulonge nggoni ngan xa xeihen xa di e xamim hokorong tang, e di munggulil xat kuh pispisien navan xil e mutamuun xole ti xa mube navan. Ma nasah puiteh tei xa mukila mukital muxo en xa moletin tovuol mikila vakoe xole. ☆ <sup>9</sup> !Muteong kuhi! Ngan xil xa di langgulil xat sexien matu na Siu xil e labit labe Siu reitin, xil dit langgulil xat nenemien na Temat e lamei di laluvos moletin xil holu. Inou nisak ni xil mei litingeiril pe metemim tetengan lisa merereen nae mi xamim, e likila sung xa eheien navan di e xamim. ☆

<sup>10</sup> “Vengan xa vehakut di mulong xat rae navan xil del nenemien xa teviei e melele xa di mubisu ni melele te xeih xil, inou ti nisikoe xol xamim ra longpangasien xil xa ti imei tetengan isak pis moletin xil te ut etan. ☆

---

☆ 3:5: Rev 3:18; 4:4; 6:11; 7:9,13; 19:14; Eks 32:32,33; Sam 69:28; Rev 17:8; 20:15; Eks 32:32,33; Sam 69:28; Dan 12:1; Plp 4:3; Rev 13:8; 17:8; 20:12,15; 21:27; Mat 10:32; Luk 12:8 ☆ 3:7: Siob 12:14 ☆ 3:8: Rev 2:2; 3:1,15; 1Kor 16:9 ☆ 3:9: 2Kor 11:14,15; Rev 2:9; Aes 45:14; 49:23; 60:14; 43:4 ☆ 3:10: Luk 21:19; 2Tim 2:12; Hib 10:36

<sup>11</sup> Nave nousav ti, inou nimei. Mak iaxa, muhur xat neketen namim ixeih. Imak, ma munamaen moletin ti namei tangan nakan ni huit neketen hos ak ra xamim.†

✧ <sup>12</sup> Ngan xil xa lasoh nggeih e neketen nae, nisak ni xil mei lihe seteman te Nim Eo na Hi navan, e liti en vehakut. Nitisi xat his Hi iti e xil itel his taon nan xa be Serusalem Hu xa ixo ut nesao imei e tan. E nitisi xat his hu navan mun iti e xil. ✧

<sup>13</sup> “!Xosxa vurangemim di, ma muteong kuhi ni naha xa Ninin di biteni ba mi sias xil!”

### *Selxatien ba mi sias te hal Laodisia*

<sup>14</sup> Iesu bit rilomun ni minou bit, “Utis sepinien ak iha mi masxaxa xa di miketeh xol sias te hal Laodisia uhit: ✧

“Ngan ak be selxatien na ngan xa be Reitinen, e holesok xil xa di biteni be reitin e moletin xil lakila lake reitin en. Xi be vatite te holesok xil vus xa Hi tepeas ni. <sup>15</sup> Nakil naha xa di mupol ni. Napus kila xa mutamerir ti e mutatin ti e neketen namim. Ieok bei mak mu vahit muve tei e xalul!

✧ <sup>16</sup> E vengan xa mumak tang, mutamerir ti e mutatin ti, inou nikusah rat xamim ra vulongok. <sup>17</sup> Xamim mubit, ‘Holesok namem holu e madi e hosien, matave tamure ni ti neta.’ !E mutakil ti xa xamim mupin tang tangan moletin sav tei vapus male ni xamim e ien vasae e xamim tang! Pe met Hi mube hoeo, muka hon, e metemim bar. ✧

<sup>18</sup> Mak, ma nasel xat xamim tangan mei muxal gol, eising xa mieh, e meresin te metemim ra nou. Gol xa muxale ra nou memese, isak ni xamim mupolu ni holesok xil te ut nesao. Eising xa mieh te momalen be tangan musing xol tenbemim ni tangan munave unoun ti mun vengan di

---

† 3:11: Rev 2:10 bit huit neketen nar be meulien sal. ✧ 3:11: Rev 2:16;

22:7,12,20 ✧ 3:12: Rev 14:1; 22:4; Esek 48:35; Rev 21:2; Aes 62:2; 65:15

✧ 3:14: Rev 1:5; 19:11; Pro 8:22; Sion 1:3; Kol 1:15 ✧ 3:15: Rev 2:2; 3:1,8

✧ 3:17: Hos 12:8

muka hon. E meresin te metemim, mulingi ite metemim te neketen tangan mukila muketeh kuhi. ✧

<sup>19</sup> “Ngan xil xa eheien navan di e xil, di namal ni xil e nameas pangas xil. Misak ni, mupol ni nenemien namim ixieh tangan muhiles ra tesaen namim xil. ✧ <sup>20</sup> !Muteong kuhi! Inou nadatil xamim kekes nggoni ngan xa di nasoh e puiteh e di nakes xamim. Xosxa mulong raeok e musah puiteh te meulien namim minou, ma nimei nim e nianien itel xamim, e xamim mun muanien itel inou. ✧ <sup>21</sup> E vaeen te neketen, ngan xil xa lasoh nggeih, nimaen xil litotan e von xeihen navan itel inou ixoni ngan taxa inou mun nasoh nggeih e vaeen te neketen, e xosali, di nadotan nade ri matu te von xeihen na Tata navan.

<sup>22</sup> “!Xosxa vurangemim di, ma muteong kuhi ni naha xa Ninin di biteni ba mi sias xil!”

## 4

### *Holesok xil te ut nesao lasa memesien ba mi Hi*

<sup>1</sup> Melele xa nanggur sepinien ak bus, napus kil neta teimun nggo metuveen. Napus puiteh tei e ut nesao xa misaha. E rae xa nateong ni diamu xa misel nggeih nggoni amaru, xi biteni minou bit, “Amei nesao xalei tangan nipisen ni minuk naha xa istal e melengien xil xa ti imei.”

✧ <sup>2</sup> Vatakes, Ninin na Hi mise xat nou e napus ngan xa di dotan de von xeihen te ut nesao. ✧ <sup>3</sup> Tenben minehin holu nggoni hat hos xil xa laminehin melele xa laet pili di en xa kala nen nggoni hat xalu xa lakes xalu ni saspas e kanilian. E mikapis xol von xeihen nan, napus hinehin

---

✧ 3:18: Rev 3:5; 4:4; 6:11; 7:9,13; 19:14; 16:15 ✧ 3:19: Pro 3:12; 1Kor 11:32; Hib 12:6; Rev 2:5,16,22; 3:3 ✧ 3:20: Sion 14:23 ✧ 4:1: Eks 19:20,24; Dan 2:28,29,45; Rev 1:1,19 ✧ 4:2: 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:9; 5:1,7,13; 6:16; 7:10,15; 19:4; 21:5

tei xa minehin nggoni hat hos xa lakesi ni emeral. ✧ <sup>4</sup> E mikapis xol von xeihen nen ak, napus von totanen sav xil mun xa labe hanutap tei e hat mun (24). E elda hanutap tei e hat mun (24) di ladotan en xa lasing ni eising xa mieh e vat luvoluv te lelatatien xa lapol ni ni gol di vatixil. ✧ <sup>5</sup> E nggo von xeihen xa eilep, an di milangas e veta di mirum. Pe met ngan xa dotan en, laet lu e he sav (7) na Hi di pili de pos nen xil. Laet xil ak labe Ninin lu e he sav (7) na Hi. ✧ <sup>6</sup> ✧ E tan xa von xeihen xa eilep da en mahulong pupu e mexal nggoni tas, e napusi di minehin nggoni kilas xa laet di pili da en. ✧

Di, napus neta hat (4) xa lameul ladi e rin hat (4) te von xeihen ak, e metexil ladi xorelis rute xil vus te tenbexil. <sup>7</sup> Ngan xa diamu ni xil, napusi nggoni laeon. Ngan xa be lu e xil, napusi nggoni bul. Ngan xa be tol e xil, napus valnaon nggoni valnao moletin. E ngan xa be hat e xil, napusi nggoni vevaxum xa di mingga. <sup>8</sup> E xil kekes, aveouxil tei e he sav (6) di en, e metexil ladi xorelis rute xil vus te tenbexil. ✧ E vongien e melengien xil vus, latangel ni ti sisien ak xa bit,  
“Eo, eo, eo,

be Hi Suv te Xeihen. ✧

Teta tetiamu, da xosali,

e ita e melengien xil xa ti imei.” ✧

<sup>9</sup> Neta hat (4) xa xiak xa lameul di lapet rat his ngan xa dotan de von xeihen nan e di lasa merereen e memesien nae mini, mi xi xa da xa da, e nakesae ti vatova. E melele xa

✧ 4:3: Esek 1:26-28 ✧ 4:4: Aes 24:23; Rev 3:5,18; 6:11; 7:9,13; 19:14

✧ 4:5: Eks 19:16; Esek 1:13; Rev 8:5; 11:19; 16:18; Esek 1:13; Sak 4:2; Rev 1:4;

5:6 ✧ 4:6: Esek 1:5-10; 10:14 ✧ 4:6: Esek 1:22 ✧ 4:8: Aes 6:2; Esek

1:18; 10:12 ✧ 4:8: Aes 6:3; Amos 3:13; 4:13; Rev 1:8; 11:17; 15:3; 16:7,14;

19:6,15; 21:22 ✧ 4:8: Aes 41:4; Eks 3:14; Rev 1:4,8; 16:5

lapol ni mak, ☆ 10 elda xil xa labe hanutap tei e hat mun (24) lamot labe tan mi ngan xa dotan de von xeihen xa eilep, ngan xa da vehakut tang. Pe meten, laleh rerat vat luvoluv te lelatatien nae xil, e lasa ni mini tangan lapisan merereen nae mini. E melele xa di lapol ni, labiteni labit,

11 “!O Hi, xouk obe Suv namem!

Opin tangan ti masa merereen minuk,

e mapus kil minehinen te xeihen nam xa be mahulong pupu,

vengan otepeas vuol ni holesok xil vus.

Reitin, nggusil nenemien nam,

otesak ni holesok xil vus mei lastal e lameul ladi.”

## 5

*Lalang ni tova xa pipin tangan ti ivuli sepinien usil holesok xil xa ti imei*

1 Melele xa napas holesok xil ak bus, napas ngan xa dotan de von xeihen nen di nggur xat uvei tei de hen metu xa sepinien di rin xalu vus. Labulun xati e labil xati ni siil lu e he sav (7).\* ☆ 2 Di, napas vat tei na masxaxa xil xa miki be nesao del rae tei xa nggeih bit, “?!Visi tova iaxa pipin tangan vavul papas siil xil ak e vavuli sepinien xa de uvei teni!” 3 E latakamet ti moletin tova e ut nesao mu e ut etan mu pe huitan xa vapi tangan vavul papas siil xil e vavuli sepinien xa de uvei ak. 4 Misak ni, namuis nggeih

---

☆ 4:9: 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2; 5:1,7,13; 6:16; 7:10,15; 19:4; 21:5; Dan 4:34; 6:27; 12:7 \* 5:1: Tetiamu, melele xa eilep tei tetis uvei tei, xi tevil xat uvei ak ni wax te kandel xa mei be siil nan melele xa xi tetaxat xati ni ring xa hisen da en. Mak, ma moletin xa ihur uvei ak ipus kil his moletin xa tesa ni mini e ipus kila mun xos mosav tei tetal pasi. ☆ 5:1: 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2,9; 5:7,13; 6:16; 7:10,15; 19:4; 21:5; Aes 29:11; Esek 2:9-10

vengan xa lasakras lakamet moletin tova xa vapin tangan valang rat uvei e vavuli sepinien xa da en.

<sup>5</sup> Di, tei e elda xil bemei e biteni minou bit, “Onamuis ti. Pusi ti mu. Ngan xa lakesi ni laeon te vatimol na Sudah di bemei. Xi be havneli tei na suv toto Deved e momal tangan vahur lelatatien nan. E, e vaeen te neketen, xi tehu len xeihen na Temat tuei. Xi kestang pipin tangan vavul papas siil xil, valang rat uvei ak, e vavuli sepinien xa di en.” ✧

<sup>6</sup> Di, napus ngan xa temaen xoteh meulien nan texoni sulut sipsip te sanien eo tei. Xi misomal dat sangas ni von xeihen, e hilaep te elda xil e neta hat (4) xa lameul ladi. Napusi nggoni mun xa latehu vini ngamu, di, mea rilomun e meul tang da. Hon te xeihen nan be lu e he sav (7) e meten mun be lu e he sav (7). Meten lu e he sav xa xiak labe Ninin lu e he sav (7) na Hi xa misil xil ba lakapis xol rute xil vus te ut etan. ✧ <sup>7</sup> Ngan xa nggoni sulut sipsip ba be visal ngan xa dotan de von xeihen e nggur uvei ak ra hen matu. ✧ <sup>8</sup> E melele xa ngguri, neta hat (4) xa lameul ladi del elda hanutap tei e hat mun (24) lamot labe tan mini. Xil kekes langgur xat harp tangan lipilei ni sisien xil mi Hi, e pesin hos tei xa lapol ni ni gol. E pesin xil ak, di ladin vokon hos xil en xa be sisen xil na moletin xil na Hi. ✧ <sup>9</sup> E melele xa lapol ni mak, di lakikei ni sisien hu tei labit, ✧

“Xouk opin tangan ovur uvei ak,  
e ovul papas siil xil teni.

Opin vengan xa latehu vinuk, e rem texal rat moletin xil  
mei labe na Hi.

---

✧ 5:5: Sen 49:9-10; Aes 11:1,10; Rev 22:16    ✧ 5:6: Aes 53:7; Sion 1:29,36;  
Rev 5:12; 13:8; Sak 4:10; Rev 1:4; 4:5    ✧ 5:7: 1King 22:19; 2Kron 18:18; Sam  
47:8; Aes 6:1; Esek 1:26-27; Rev 4:2,9; 5:1,13; 6:16; 7:10,15; 19:4; 21:5    ✧ 5:8:  
Sam 141:2; Rev 8:3,4    ✧ 5:9: Sam 33:3; 40:3; 96:1; 98:1; 144:9; 149:1; Aes  
42:10; Rev 14:3

Reitin, otexal rat moletin xil ra vatimol xil ngasen e  
 ra sepinien xil vus,  
 ra kantri xil ngasen e ra tatit moletin savsav xil  
 mun. ☆

<sup>10</sup> Otepol ni xil mei labe vanut moletin xil  
 xa di lamerere ni Hi nggoni suv toto te meulien nae.  
 Xouk otesak ni xil mei lapol mini nggoni pris nan xil  
 e mei lilaxat ut ngasen e ut etan.”

<sup>11</sup> Melele xa di naketeh mikapis, nalong rae masxaxa xil  
 xa labe holu xa labe holu pupu, moletin misakras vavuli  
 sen xil. Xil lasoh xorelis von xeihen xa mahulong na Hi  
 del neta hat (4) xa lameul e elda xil mun. ☆ <sup>12</sup> E masxaxa  
 xil ak lakikei nggeih be nesao labit,

“Di mapet rat his ngan xa latehu vini,  
 ngan xa temat texoni sulut sipsip te sanien eo tei, e  
 di, mea rilomun ra maten.  
 Xi pipin tangan ihur xeihen, metisouen, lelatatien, e  
 ipolu ni holesok xil,  
 e tangan ihur merereen, hosien, e his xa ihe eilep  
 mak mu.” ☆

<sup>13</sup> Di, nalong rae holesok xil vus xa lameul ladi di lakikei:  
 ngan xil xa ladi ut nesao e ngan xil xa ladi e ut etan; ngan  
 xil xa ladi pe huitan e ngan xil mun xa ladi e huinep te  
 tas. ☆ Reitin, nalong xil vus di lakikei labit,

“!Mapet rat ngan xa dotan de von xeihen xa mahulong  
 e ngan mun xa nggoni sulut sipsip te sanien eo!  
 !Xalu vus lupin tangan mamerere ni xalu e masa meme-  
 sien mi xalu

---

☆ 5:9: Eks 19:6; Aes 61:6; 1Pit 2:5,9; Rev 1:6; 20:6; 22:5 ☆ 5:11: Dan  
 7:10; Hib 12:22 ☆ 5:12: 1Kron 29:11; Aes 53:7; Sion 1:29,36; Rev 5:6; 13:8  
 ☆ 5:13: 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2,9;  
 5:1,7; 6:16; 7:10,15; 19:4; 21:5

e minehinen te xeihen nalu iti vehakut xa vehakut tang!”

<sup>14</sup> Melele xa lasepin mak, neta hat (4) xa lameul ladi labit, “!Reitin li!” E elda xil vus lamot labe tan mi xalu e lapet rat hisealu.

## 6

*Ngan xa nggoni sulut sipsip bul papas siil xil xa misak ni longpangasien xil lastal*

<sup>1</sup> Di, napus ngan xa nggoni sulut sipsip bul pas siil tei ra siil lu e he sav (7). Melele xa bul pasi, nalong tei e neta hat (4) xa lameul mikei del rae tei xa nggeih nggoni veta bit, “!Amei!” <sup>2</sup> Melele xa naketeh ba, napus hos tei xa mieh. E ngan xa dotan en di nggur xat his te vaeen nan e vat luvoluv te lelatatien de vatin. Kei miloh ba tangan vavae vatel ngan xil xa labe elu nan e vahas tan ni xil. ☆

<sup>3</sup> Di, ngan xa nggoni sulut sipsip bul pas siil xa be lu e xil. Melele xa bul pasi, nalong ngan xa be lu nen e neta hat (4) xa lameul mikei bit, “!Amei!” <sup>4</sup> E napus hos tei mun xa pipili mei mistal. E ngan xa dotan en, lasa xeihen mini tangan vasak ni vaeen xil mei vastal e rute xil vus te ut etan tangan vasak ni moletin xil ha lihas vin xil mun tang. Misak ni, lasa tiei te vaeen mini xa mahulong pupu. ☆

<sup>5</sup> Di, ngan xa nggoni sulut sipsip bul pas siil xa be tol e xil. Melele xa bul pasi, nalong ngan xa be tol (3) nen e neta hat (4) xa lameul mikei bit, “!Amei!” Melele xa naketeh ba, napus hos teimun xa maluxoluk mei mistal. E ngan xa dotan en di po xat sikel tei de hen. ☆ <sup>6</sup> Di, rae tei misel e nalonge nggoni ngan xa rae ak nggo hilaep te neta hat (4) xa lameul ladi. Rae ak biteni mi ngan xa de hos bit, “Uha usak ni anien ihe tamure e ut etan xa moletin ipol

☆ 6:2: Sak 1:8; 6:3,6; Rev 19:11

☆ 6:4: Sak 1:8; 6:2

☆ 6:5: Sak 6:2,6

melengien tevi tei tangan ixal anien ihe hokorong tang. E onapurun urvatie te olip mu grep xil ti xa lapol ni oel e uaeen nggo huit xalu.”

<sup>7</sup> Di, ngan xa nggoni sulut sipsip bul pas siil xa be hat (4) e xil. Melele xa bul pasi, nalong ngan xa be hat nen te neta hat (4) xa lameul ladi miki bit, “!Amei!” <sup>8</sup> ☆E melele xa naketeh ba, napas hos tei xa kala teni misa nggoni neta xa mat tuei e bo. E ngan xa dotan en, hisen Maten, e teimun xa lakesi ni Hedis di nggusil xati. Nggo moletin xil vus te ut etan, Hi maen rat tatit moletin tei mi xalu tangan lalihas vin xil ixo vaeen, mu mae kekaten, mu mesien, mu vuran xil. E tatit moletin tol (3) kestang lalnaxol xil ti. ☆

<sup>9</sup> Di, ngan xa nggoni sulut sipsip bul pas siil xa be lim e xil. Melele xa bul pasi, naketeh ba be pe hor te sanien eo, e napas nini moletin xil xa latehas vin xil vengan xa latehithiten sepinien na Hi e ulixil tenakan ti tangan lavit rati xa Iesu be Suv nae. <sup>10</sup> Xil lakei be nesao ba mi Hi labit “!Hi Suv te xeihen, obe eo e obe reitin! ?Vilieh vari mei ulepis rin na moletin xil te ut etan e usa rilomun ni pangasien mi ngan xil xa latehas vin xamem?” ☆

<sup>11</sup> Misak ni, mi xil kekes, Hi misa eising xa mieh e biteni mi xil bit, “Mungel vuteili mu. Vengan xa pupuluken xa nateling xati ve ngan xil xa limat ixoni xamim tavus ti mu. Nave nousav ti, moletin xil mei lihas vin moletin te polien sav xil navan xa labe tuemim e hinemim xil ve neketen nae.” ☆

<sup>12</sup> ☆Di, napas ngan xa nggoni sulut sipsip bul pas siil xa be tei e he sav (6) e xil. Melele xa bul pasi, lul tei xa

---

☆ 6:8: Rev 1:18 ☆ 6:8: Ser 14:12; 15:3; Esek 5:12,17; 14:21; 33:27

☆ 6:10: Dut 32:43; 2King 9:7; Sam 79:10; Rev 19:2 ☆ 6:11: Rev 3:5,18;

4:4; 7:9,13; 19:14 ☆ 6:12: Aes 13:10; Esek 32:7,8; Soel 2:10; 3:15; Mat 24:29; Mak 13:24-25; Luk 21:25; Rev 8:12

mahulong milil e ut etan. Eai taxan ti mun e ut xil vus mei maluxoluk nggoni eising te maten. Mem te aveti biles mei pili nggoni ra. ☆ 13 Hitu xil lakiri lamei e ut etan langgoni huit fik xil xa latamen ti mu e votiang te xeih tei mei mulul lelen xil lakiri labe tan. ☆ 14 Napus tilang hat mesel be rin lu, e lukalu ni xalu ba luduxoh hoxalite te xalu. Vathu xil vus e aelan xil vus mun, lamea reling vonexil. ☆ 15 Melele xa holesok xil ak mistal mak, moletin xil vus te ut etan lalesae labe vathu xil e langgus e vangihat xil mu seri hat xil xa mahulong: suv toto xil te ut etan del eilep sav xil, vat xil na moletin xil te vaeen del ngan xil mun xa langgur xeihen, ngan xil xa holesok nae holu del moletin votei xil mun, e ngan xil xa labe slev del ngan xil xa vexil mase. ☆ 16 Ve ulikannen nae, xil vus lakei be nesao ba mi vathu xil e mi vatihat xil labit, “!Mukiri mumei musoson xamem tangan ngan xa dotan de von xeihen te ut nesao napus ti mun xamem! !Musoson xamem ra ekaten na ngan xa nggoni sulut sipsip tangan napangei xamem ti! ☆ 17 ? Vengan xa melele te ekaten xa mahulong nalu di bemei li, visi vari ikila ihisu ni e imeul? Moletin tovuol.”☆

## 7

*Masxaxa xil laling simelelen tei de rut mol-Isrel xil*

<sup>1</sup> Dutou ni holesok xil ak, napus masxaxa hat (4) xa di lasoh ladi e rin hat (4) te ut etan. Xatel di latsikoe xol votiang hat (4) tangan linahui lelen ti holesok xil te ut etan, mu te tas, mu vatiei xil. ☆ <sup>2</sup> E napus masxaxa sav teimun xa mea nggo rute xa meteneai di mistal en,

☆ 6:12: Soel 2:31; Pol 2:20 ☆ 6:13: Aes 34:4 ☆ 6:14: Rev 16:20; 20:11  
 ☆ 6:15: Aes 2:10,19,21; Ser 4:29 ☆ 6:16: Hos 10:8; Luk 23:30; Rev 9:6;  
 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2,9; 5:1,7,13;  
 7:10,15; 19:4; 21:5 ☆ 6:17: Soel 2:11; Neh 1:6; Mal 3:2 ☆ 7:1: Ser 49:36;  
 Esek 37:9; Dan 7:2; Sak 6:5; Mat 24:31

e xi nggur xat siil xa his Hi xa meul da en. Xi mikei nggeih ba mi masxaxa hat (4) xa Hi tesa xeihen mi xil tangan lapurun ut etan del tas. <sup>3</sup> Masxaxa ak biteni bit, “Munapurun ti ut etan, tas mu vatiei xil ituxoh melele xa muling simeleleen e valnao moletin xil na Hi tangan ipisen ni xa labe nan.” ☆

<sup>4</sup> E labiteni minou labit pupuluena na ngan xil xa latehur simeleleen na Hi latetuxoh moletin taosen be handred tei hanutap lu e hat mun (144,000). Labosei ngan xil ak langgo vatimol lu e le tei (12) na mol-Isrel xil. ☆  
<sup>5-8</sup> Labosei moletin taosen lu e le tei (12,000) xa langgo vatimol xil kekes na mol-Isrel xil ak: Sudah, Ruben, Kat, Aser, Navtali, Manase, \* Simeon, Livae, Isekar, Sebiulon, Siosep, e Bensamin.

*Moletin xil te rute xil vus te ut etan mei lamot mi Hi e lapet rat hisen*

<sup>9</sup> Di, naketeh ba, e napas vanut moletin xil xa labe holu xa labe holu pupu, xa moletin tovuol mikila vavuli sen xil vus. Xil lastal langgo hisit moletin savsav xil vus, langgo vatimol xil vus, langgo kantri xil vus, e langgo sepinien xil vus. Xil vus mei lasoh pe met ngan xa de von xeihen e pe met ngan xa nggoni sulut sipsip. Lasing ni eising xa mieh e laleh xat ut emeil xil di e hexil. ☆ <sup>10</sup> E lakei be nesao labit, “!Mames Hi namem xa dotan de von xeihen e ngan xa nggoni sulut sipsip, vengan xalu di luteh meulien e xamem!” ☆

<sup>11</sup> Melele taxa labiteni mak, masxaxa xil vus xa ladi xorelis von xeihen ak, elda xil, e neta hat (4) xa lameul ladi, xil vus lamot labe tan pe met Hi, valnaoxil ba duxoh

---

☆ 7:3: Esek 9:4; Rev 9:4 ☆ 7:4: Rev 14:1,3 \* 7:5-8: Manase, hisen sav be Dan (Sen 35:26). ☆ 7:9: Rev 3:5,18; 4:4; 6:11; 7:13; 19:14 ☆ 7:10: 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2,9; 5:1,7,13; 6:16; 7:15; 19:4; 21:5

tan e lamesi. <sup>12</sup> E melele xa masxaxa xil ak lamesi, xil vus labiteni labit,

“!Reitin li!

!Xamem mapet rat hisom,

e di masa memesien e merereen namem bat minuk!

Xouk obe eilep pupu e metisouen nam mahulong,

xeihen de hem e di olaxat kuh holesok xil vus.

Obe Hi namem

xosali e vehakut tang. !Reitin!”

<sup>13</sup> Di, tei e elda xil ak mei misis nou bit, “?Moletin xil ak xa lasing ni eising xil xa mieh xiak, okila obit langgo xave?” ☆

<sup>14</sup> E nabit rilomun ni mini, nabit, “Eilep navan, inou natakil ti. E xouk okila.” ☆

Ma xi biteni minou bit, “Moletin xil ak labe ngan xil xa latesoh texeih e neketen nae teha tetuxoh hoxalite te melele te xeih xil xa mahulong xa temeï e ut etan. Xil latekas eising nae ni re ngan xa temat texoni sulut sipsip te sanien eo e eising nae mei temieh. <sup>15</sup> Ve rin ak, Hi maen xil mei lasoh pe meten. E vongien e melengien ladi e Nim Eo nan e di lamot mini. Reitin, di lamot mi ngan xa di dotan de von xeihen nan xa di milaxat kuh xil e di misikoe xol xil. ☆ <sup>16</sup> Mae e maruru naxat ti mun xil, eai naxa pangas xil ti mun e upang teni napangei pupu ni xil ti, ☆ <sup>17</sup> vengam xa ngan xa nggoni sulut sipsip xa di misoh de von xeihen ilaxat kuh xil. Itiamu ni xil ixoni ngan xa moletin tei di diamu kuhi ni sipsip san xil, e ipisen suse xa ba be vatit oei te meulien mi xil. E simetexil te longpangasien nae, Hi isihia ra metexil.” ☆

---

☆ 7:13: Rev 3:5,18; 4:4; 6:11; 7:9; 19:14 ☆ 7:14: Dan 12:1; Mat 24:21; Mak 13:19 ☆ 7:15: 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2,9; 5:1,7,13; 6:16; 7:10; 19:4; 21:5 ☆ 7:16: Aes 49:10 ☆ 7:17: Sam 23:1; Esek 34:23; Sion 10:11,14; Sam 23:2; Aes 49:10; Ser 2:13; Aes 25:8; Rev 21:4

## 8

*Ngan xa nggoni sulut sipsip bul pas siil xa be lu e he sav (7) e xil*

<sup>1</sup> Melele xa ngan xa nggoni sulut sipsip bul pas siil xa be lu e he sav (7) e xil, holesok xil vus xa ladi ut nesao ladi votei vuteili. <sup>2</sup> Di, napas vatixar lu e he sav (7) na masxaxa xil xa, vehakut, di lasomal pe met Hi. E lasa amaru lu e he sav (7) mi xil.

<sup>3</sup> Masxaxa teimun bemei e misoh visal hor te vokon eo. Xi nggur xat pesin tei xa lapol ni ni gol xa di ladin vokon eo xil en. Lasa vokon holu mini xa be sisen na moletin xil vus na Hi. Ma masxaxa ak milehi ba milingi di e hor te vokon eo xa lapol ni ni gol xa de sangas ni von xeihe na Hi. ✧ <sup>4</sup> Xi po xat pesin ak e pisen ni mi Hi, e eas teni be nesao del sisen na moletin xil na Hi. ✧ <sup>5</sup> Di, masxaxa nggur pesin ak e mise xati ni hatupang xil xa di tamu pili xa milehi ra hor teni. Di, mirang rati be ut etan. Ngan ak misak ni veta mirum, an bilahil, e lul milil nggeih. ✧

*Vatixar lu e he sav (7) na masxaxa xil labue xat xil tengan lavui amaru nae xil e vasak ni longpangasien xil mei vastal*

<sup>6</sup> Di, vatixar lu e he sav (7) na masxaxa xil labue xat xil tengan lavui amaru nae.

<sup>7</sup> Melele xa vatixar xa be tei e xil bui amaru nan, saxut aes mikiri nggoni us e bemei e ut etan del upang xa ra di en. Nggo vatiei xil vus te ut etan, upang ak ngga tatit vatiei tei teni, e tatit vatiei lu kestang taxa len xil ti. E upang nen ak ngga len munae xil vus xa lameul ladi e ut etan. ✧

<sup>8</sup> Di, vatixar xa be lu e xil bui amaru nan. Melele xa bui, napas neta tei nggoni vathu tei xa mahulong xa upang di

---

✧ 8:3: Sam 141:2; Rev 5:8; 8:4; Eks 30:1-3; Rev 9:13    ✧ 8:4: Sam 141:2; Rev 5:8; 8:3    ✧ 8:5: Lev 16:12; Eks 19:16-19; Rev 4:5; 11:19; 16:18    ✧ 8:7: Eks 9:23-25; Esek 38:22

pili en xa laso ni be tas. ☆<sup>9</sup> Nggo holesok xil vus xa lameul ladi tas, tatite tei teni lalel, ma tatite lu teni kestang latalel ti. E nggo tuturil xil xa ladi e tas, tatit tuturil tei teni mei labe saxute xil tang, ma tatit tuturil lu teni kestang mei latave saxute ti.

<sup>10</sup> Di, vatixar xa be tol (3) e xil bui amaru nan. Melele xa bui, hitu tei xa mahulong xa upang di pili en mot nggo tilang hat e bemei posou e tatite tei te oeisal e vangoei xil, ma tatite lu teni kestang tapurun xil ti. <sup>11</sup> His hitu ak be 'Mikon' e misak ni oei nen xil ak biles mei mikon e misa e moletin holu lalel vengan xa lamu oei xa mikon xiak. ☆

<sup>12</sup> Di, vatixar xa be hat (4) e xil bui amaru nan. Melele xa bui, neta tei mei posou e rin tei te meteneai e aveti, del tatit hitu tei mun. Ma rin lu te meteneai e aveti, del tatite lu te hitu xil kestang tapurun xil ti. Misak ni, xil latapili ti mun vaxoni tetiamu. Ma, e melengien xil vus, miehen teni minggan haoa tol e he sav (8) kestang, e haoa hat (4), miehen teni mei maluxoluk. E vongien xil vus mak tang, aveti mem haoa tol e he sav (8) kestang, e haoa hat (4), tamem ti. ☆

<sup>13</sup> Di, naketeh be nesao e napus vevaxum tei di ngga e mesavuol. Nalong raen xa mikei nggeih bit, "Aue li! Aue li! O aue li! Isa xa isa pupu mi ngan xil xa ladi e ut etan e melele xa vatixar xatel xa latdi tamu latihui amaru natel!"

## 9

<sup>1</sup> Di, vatixar xa be lim (5) e xil bui amaru nan. Melele xa bui, napus masxaxa tesa tei xa mot bemei e ut etan nggoni hitu tei. Lasa ki te Vangavul xa hoxalite teni tovuol mini.\* ☆<sup>2</sup> Xi bemei misah puiteh te Vangavul ak, e eas

---

☆ 8:8: Eks 7:20,21 ☆ 8:11: Ser 9:15 ☆ 8:12: Aes 13:10; Esek 32:7,8; Soel 2:10; 3:15; Mat 24:29; Mak 13:24-25; Luk 21:25; Rev 6:12-13 \* 9:1: Vangavul ak be nim te xeih na ninin tesa xil ha ituxoh Melengien te Lepisien. ☆ 9:1: Rev 20:1

holu mistal nggo en nggoni eas te upang tei xa mahulong. Eas ak misak ni miehen e tilang hat mei maluxoluk. ✧<sup>3</sup> Di, holesok xil xa langgoni kelmenamen lastal langgo eas ak e lamei e ut etan. Xil langgur poisen de xalexil nggoni skopion xa mikila isa longpangasien xa mahulong mi moletin xil melele xa itil xil ni. ✧<sup>4</sup> Lasemae ni xil tangan linapurun ti husmunae, vatiei mu holesok sav xil mun xa lateh e lameul ladi e ut etan. Hi maen xil tangan lipangei kes ni moletin xil taxa latahur ti simeleleen na Hi vati e valnaoxil. ✧<sup>5</sup> Aveti lim (5) iaxa Hi maen kelmenamen xil ak mei lasa longpangasien holu mi moletin xil, e tamaen xil ti tangan lavas vin xil. Longpangasien ak nggoni ngan xa moletin ngguri melele xa skopion dili. ✧<sup>6</sup> E melele nen ak, moletin xil lalang ni maten ve longpangasien nae, e lasakras lakameti. Reitin, xil iexil bei mak mu tangan lamat, e maten milesae ra xil. ✧

<sup>7</sup> Kelmenamen xil ak, neta tei misikoe xol tenbexil xa misak ni napus xil nggoni hos xil xa lasak mesen xil ve vaeen. E vatixil, napus neta ngan xa nggoni vatluvoluv na suv toto xil xa lapol ni ni gol, e valnaoxil, napusi nggoni valnao moletin. ✧<sup>8</sup> Hilixil tepiei nggoni hil atou xil, e luhexil mikan nggoni luhe laeon. ✧<sup>9</sup> E valhasexil nggeih nggoni eising te vaeen xa lapol ni ni aean. E melele xa di langga, tangalen te aveouxil nggoni tangalen e melele xa hos xil lalihi kat te vaeen xil holu ba labe von vaeen. ✧<sup>10</sup> Poisen nae de xalexil nggoni skopion, e melele xa ladil moletin ni, moletin ak milong pangas xi holu xa holu pupu. E xil laba e ladil moletin xil duxoh aveti lim (5). ✧<sup>11</sup> Masxaxa tesa xa milaxat Vangavul xa hoxalite teni tovuol iaxa be suv toto nae. E sepinien na mol-Isrel

---

✧ 9:2: Sen 19:28; Eks 19:18   ✧ 9:3: Eks 10:12,15   ✧ 9:4: Esek 9:4; Rev 7:3   ✧ 9:6: Siob 3:21; Ser 8:3; Hos 10:8; Luk 23:30; Rev 6:16   ✧ 9:7: Soel 2:4,5   ✧ 9:8: Soel 1:6   ✧ 9:9: Soel 2:5

xil, hisen ‘Abadon,’ e, e sepinien na mol-Kris xil, hisen ‘Apolion,’ xa koute te his xalu ak be ‘ngan xa di nggu lelen holesok xil.’

<sup>12</sup> !Aue li! Ngan ak be hoxalite te melele te longpangasien xa be vatei nen. !E aue, o aue li! Vengan, itutou ni ngan ak, melele te longpangasien lu mun mei lalistal.

<sup>13</sup> Di, vatixar na masxaxa xil xa be tei e he sav (6) e xil bui amaru nan. Melele xa bui, nalong rae tei xa mistal nggo rin hat (4) te hor te sanien eo xa lapol ni ni gol xa de pe met Hi. ✧ <sup>14</sup> Rae nen ak biteni mi vatixar xa be tei e he sav (6) e xil bit, “Uhe visal masxaxa hat (4) xa latevar xat xatel latteti visal Oeisal Upretis, e umaen xatel ha veatel imase.” <sup>15</sup> Hi teling masxaxa xil ak ladi inggak tangan litatil haoa xati ak te melengien ak te aveti ak te hurang ak vari. Reitin, teling xil temak tangan, e melele nen ak vari, xil likila ha vexil imase e ha lihu vin tatite tei te moletin xil vus te ut etan, ma tatite lu (2) teni kestang linahu vin xil ti. ✧

<sup>16-17</sup> E metuveen navan, napus kuh moletin te vaeen na masxaxa xil ak. Xil laloh e hos nae xil, e melele xa labuli xil, nalonge xa labe milian handred lu (200,000,000). Eising te vaeen nae pipili nggoni upang, memas nggoni tas, e meang nggoni sulfa.† Vat hos xil langgoni vat laeon, e upang, eas, e sulfa di lastal langgo vulongexil. <sup>18</sup> Nggo longpangasien xatel ak te upang, eas e sulfa xa lastal langgo vulongexil, tatite tei te moletin xil vus te ut etan amat, ma tatite lu teni kestang lameul tang ladi. <sup>19</sup> Xeihen na hos xil de vulongexil del xalexil. E xalexil mun mikila vapangei moletin vengang xa hoxalit xalexil, vat xil ladi en xa di ladil moletin xil nggoni tetal tesa xil.

---

✧ 9:13: Eks 30:1-3; Rev 8:3 ✧ 9:15: Rev 8:7-12 † 9:16-17: Sulfa be hat tei xa meang e taxeih ti. E melele xa lalingi de upang, pili nggeih e eas teni bo nggoni rahat.

<sup>20</sup> Moletin xil xa latalel ti mu e longpangasien xatel te upang, eas e sulfa, xil lataviles ti ra sexien tesa nae xil. Langgulehi tangan lamot mi ninin tesa xil e nanao xil xa lasakras laketeh, lasakras lataeong ni neta, e lasakras lakakao xa lapol ni xil ni gol, silva, brons, hat e liei xil del hexil tang. ☆ <sup>21</sup> Reitin, moletin xil ak lataviles ti ra sexien xa di labas vin moletin sav xil, sexien te eimas, sexien te hoeasoen, e sexien te kakanen nae. ☆

## 10

### *Masxaxa tei misa uvei tei mi Sion*

<sup>1</sup> Di, napus vatixar teimun na masxaxa xil xa nggo ut nesao bemei e ut etan. Momah tei mikutaxole e hinehin tei de nesao ni vatin. Valnaon di minehin nggeih nggoni eai e len xalu lupili lunggoni upang. <sup>2</sup> E hen, xi nggur xat tutut uvei tei xa milanga da xa latetis sepinien xil en. Napusi miling len matu de tas, e len meil milingi de tan. <sup>3</sup> Di, miki nggeih nggoni laeon tei. E melele xa miki mak, veta lu e he sav (7) mirum nggeih. <sup>4</sup> Melele xa veta xil ak larum mak, inou nabue xat inou tangan nitisi. E nalong rae tei misepin minou nggo ut nesao bit, “Naha xa veta lu e he sav (7) nen ak labiteni be sepinien xuxus tei, onatis xati ti.” ☆

<sup>5</sup> Di, napusi xa vatixar na masxaxa xil xa teling len tei tete tas e len teimun tete tan, xi pet rat hen matu e misa ni be nesao ☆ <sup>6</sup> e pol ni hitxatien te xeih tei e his Hi, ngan xa meul vehakut, xa tepeas ni ut nesao e ut etan, tas e holesok xil ngasen xa ladi e xatel. Masxaxa biteni bit, “! Nabit xati xa Hi misakras vararu mun! ☆ <sup>7</sup> Reitin, melele xa vatixar na masxaxa xil xa be lu e he sav (7) e xil ihui

☆ 9:20: Dut 32:17; 1Kor 10:19-20; Sam 115:4-7; 135:15-17; Dan 5:23 ☆ 9:21:

Rev 16:9,11,21 ☆ 10:4: Dan 8:26; 12:4,9 ☆ 10:5: Dut 32:40; Dan 12:7

☆ 10:6: Sen 14:19,22; Eks 20:11; Neh 9:6; Sam 146:6

amaru nan, Hi ipol vuol ni lingxatien xuxus nan. Ipol ni ixoni ngan taxa tehit lelen ni tuei mi provet xil xa latehe moletin te polien nan xil.” ☆

<sup>8</sup> Di, rae xa nateteong ni tetiamu misepin rilomun minou nggo ut nesao bit, “Uha uhur uvei xa lalanga tuei da xa de he masxaxa xa di misoh de tas e de tan.”

<sup>9</sup> Misak ni, nabe visal masxaxa nen ak e nasisi tangan vasa tutut uvei ak minou. E xi biteni minou bit, “Uhuri ua ni. E vulongom ikas ni ixoni hani, e vangom ikon ni.” ☆

<sup>10</sup> Misak ni, nanggur rat tutut uvei ak ra hen e nangga ni. E nakameti xa vulongok mikas ni nggoni hani. E melele xa nangga ni bus, nateong ni biles, e vangok mei mikon ni.

<sup>11</sup> Di, xi misepin rilomun minou bit, “Xouk uha uhit lelen sepinien na Hi vatei mun usil naha xa ti ipol ni mi hisit moletin xil holu, mi kantri xil holu, mi sepinien xil holu, e mi suv toto xil holu.” ☆

## 11

### *Hi misil moletin nan lu tangan ha lalhithiten sepinien nan*

<sup>1</sup> Di, masxaxa tei misa liei tei minou xa nggoni eitingil xa nikila nivuli mita xil ni, e biteni minou bit, “Uha e uvuli mita te Nim Eo na Hi e mita te hor te sanien eo mun. E uvuli ngan xil xa di lamot mi Hi en. ☆ <sup>2</sup> E vloh teni, onavuli mita teni ti, vengan Hi tesa ni ngamu mi ngan xil xa latakil ti xi. Xil mei lihes tan ni Taon Eo na Hi aveti ihe hanutap lu e lu mun (42).” ☆

<sup>3</sup> Di, masxaxa ak biteni mun bit, “E inou nisa xeihen mi provet navan lu xa ha lalihit lelen ni usil reitinen navan melengien taosen tei handred lu e hanutap tol mun

---

☆ 10:7: Dan 9:6,10; Amos 3:7; Sak 1:6 ☆ 10:9: Esek 2:8; 3:1-3 ☆ 10:11: Ser 1:10; 25:30; Dan 3:4; 7:14 ☆ 11:1: Esek 40:3; Sak 2:1-2 ☆ 11:2: Sam 79:1; Aes 63:18; Sak 12:3; Luk 21:24; Rev 12:6; 13:5

(1,260).<sup>\*</sup> Lalising ni eising te tangen e nisil xalu tangan ha lalihit usil sepinien navan mi moletin xil.”<sup>4</sup> Moletin xalu ak lube vatit olip xalu<sup>†</sup> e laet lu xa lusoh pe met Hi Suv xa di milaxat vuol ni holesok xil te ut etan.<sup>5</sup> E xosxa moletin tova ihit ipurun xalu, upang istal ixo vulongexalu e ia len ngan xil xa di labae del xalu. Ma, ngan xil xa lihit lipurun xalu limat ixo suse ak. ✧<sup>6</sup> Hi isa xeihen mi xalu tangan lalisikoe xol us namus ti ituxoh hoxalite te melengien xil xa ti lalihit lelen sepinien na Hi en. Xalu lalihur xeihen tangan lalikila lalihiles oei xil vus mei ihe ra. E xeihen iti e xalu tangan lalikila lalisa longpangasien savsav xil ha ipurun moletin xil te ut etan e melengien xil vus xa xalu iexalu ihei. ✧

<sup>7</sup> Melele xa lalihit vuol ni sepinien xa Hi tesa ni mi xalu, vongoro tesa tei imea ra Vangavul xa hoxalite teni tovuol. Xi ivae itel xalu e ihu vin xalu. ✧<sup>8</sup> Ti, tiei nalu lalipat lalitim e suse te Serusalem, taon xa eilep xa lateti xat Iesu e eivave en, ngan xa be Suv nalu. E melele xa labit usil taon xa eilep xiak, labit lelen ni xa nggoni Sodom mu Isip tetiamu. ✧<sup>9</sup> Moletin xil te kantri xil vus, vatimol xil vus, sepinien xil vus, e vatit moletin savsav xil vus mei lile mah xat tiei nalu melengien ihe tol e rute mun. Xil linamaen ni ti tangan litihin xalu.<sup>10</sup> Moletin xil vus te ut etan lisep koai ve maten nalu. Xil lipol ni anien xil xa tellep, e lisa kekes ni sanien mi xil, vengan provet xalu ak rusak ni longpangasien holu mei mistal mi moletin xil te ut etan.

<sup>11</sup> Ti, e piniae te melengien hat nen, Hi isa sesehen te

---

<sup>\*</sup> 11:3: Aveti 42 e melengien 1,260, xalu vus lube huram 3 1/2. † 11:4: Sak 4:11-14 bit usil vatit olip xalu ak xa lube eloheoh lu na Hi. ✧ 11:5: 2Saml 22:9; 2King 1:10; Sam 97:3; Ser 5:14 ✧ 11:6: 1King 17:1; Eks 7:17,19-20; 1Saml 4:8 ✧ 11:7: Dan 7:3; Rev 13:1; 17:8; Dan 7:7,21; Rev 12:17; 13:7 ✧ 11:8: Luk 13:34; Aes 1:10

meulien mi xalu ma lalimea rilomun lalisoh. E ngan xil xa lipusi, lexil imulul holu ven. ☆ <sup>12</sup> Ti, provet xalu ak lalilong rae tei ixo ut nesao ihit, “!Lumei nesao inggak!” Ma, pe met elu nalu xil, xalu lalixo momah tei lalihe ut nesao. ☆

<sup>13</sup> E melele nen tak, lul tei xa eilep ilil. Ngan ak isak ni tatite tei te nim xil te taon xa eilep xiak likiri lel, ma tatit nim hat e he sav (9) kestang teni linakiri ti. E moletin taosen lu e he sav (7000) lilel. Melele xa moletin sav xil lipusi, lexil imulul ni e like reitin sung e xeihen na Hi xa de ut nesao. ☆

<sup>14</sup> !Aue li! Ngan ak ihe hoxalite te melele te longpangasien xa be lu (2) nen. !E aue li, o aue li! Vengan, itutou ni ngan ak, melele te longpangasien xa be tol (3) nen mei istal nave nousav ti.

*Masxaxa bui amaru kor*

<sup>15</sup> Di, vatixar na masxaxa xil xa be lu e he sav (7) e xil bui amaru nan. Melele xa bui, nalong rae xil xa langgo ut nesao e lakei nggeih labit,

“Xosali, xeihen te lelxatien te ut etan

mei di e he Hi Suv nar e ngan xa be Mesaea nan.

E lelxatien nan iti vehakut tang, navus ti.” ☆

<sup>16</sup> Di, elda xil xa labe hanutap tei e hat mun (24) xa di ladotan e von xeihen nae xil pe met Hi, xil lamot mini, valnaoxil ba duxoh tan e di lapet rat hisen <sup>17</sup> del kikeien nae xil labit,

“!Hi Suv te Xeihen,

oda xosali e oteta tetiamu! ☆

Mamesuk vengan xa di opisen xeihen nam xa mahulong e omei sung tangan olaxat rute xil vus te ut etan.

---

☆ 11:11: Esek 37:5,10    ☆ 11:12: 2King 2:11    ☆ 11:13: Esek 38:19-20

☆ 11:15: Eks 15:18; Sam 10:16; 22:28; Dan 2:44; 7:14; Oba 21; Sak 14:9

☆ 11:17: Rev 1:8; 4:8; 15:3; 16:7,14; 19:6,15; 21:22

<sup>18</sup> Ngan xil xa latakil ti xouk, ☆  
e melengien te ekaten nam di bemei mi xil.

Ngan ak be melele xa ulepis  
rin na moletin xil xa lalel ngamu.

Ngan ak be melele mun xa usa huit polien  
mi provet xil xa labe moletin te polien nam xil,  
e mi moletin nam xil xa di lamerere ni xouk,  
ngan xil xa latellep ba duxoh ngan xil xa latereli.

E ngan ak be melele mun xa upurun ngan xil xa di lapurun  
holesok xil te ut etan.”

<sup>19</sup> Di, puiteh te Nim Eo na Hi e ut nesao misaha, e napusi  
xa Bokis te Hitxatien te Xeih da en. E melele xa puiteh  
misaha mak, an milangas, veta mirum, lul tei milil nggeih,  
e saxut aes xil holu lakiri nggo tilang hat nggoni us. ☆

## 12

*Dragon\* tei misak tangan vaa horamue na atou tei*

<sup>1</sup> Di, napas neta tei xa eilep mistal nggo tilang hat xa  
misak ni nou nanem usil koute teni. Napus atou tei xa  
mising ni meteneai nggoni eising nan, e aveti de pe kaelen  
xalu xa pisen ni xa xi be eilep pupu. E vatluvoluv te  
lelaxatien de vatin xa hitu lu e le tei (12) di en. † <sup>2</sup> Atou ak,  
sangas valing tuvava, e longpangasien xil tangan valing  
tuvava nggeih pupu e misak ni muis holu. ☆

<sup>3</sup> Di, napas neta teimun xa eilep mistal nggo tilang  
hat. Dragon tei xa eilep e pipili mei mistal. Vatin be lu

☆ 11:18: Sam 2:1; 46:6; Dan 9:6,10; Amos 3:7; Sak 1:6; Sam 115:13; Rev 19:5

☆ 11:19: 1King 8:1,6; 2Kron 5:7; Eks 19:16; Esek 1:13; Rev 8:5; 16:18; Eks 9:24;  
Rev 16:21 \* 12:: Dragon, lapusi nggoni iae e mahulong nggoni lerumrum

tei. † 12:1: Atou ak be vole tei usil kantri te hal Isrel xa be reitin mi Hi,  
xa mei be vole usil Sias nan mun. E hitu xil ak labe vole usil vatit vatimol lu e  
le tei (12) na mol-Isrel xil. ☆ 12:2: Aes 66:7; Maek 4:10

e he sav (7) e hon xil labe he xalu (10), e vatluvoluv te lrelaxatien de vatin lu e he sav (7) xil vus. ✧<sup>4</sup> Del xalen, xi kovés rerat tatit hitu tei labe reling tilang hat e miso xil lamei e ut etan, ma tatite lu teni kestang takoves rerat xil ti. Xi bemei sangas visal atou ak tangan ikila ia tuvava nan melele xa ilingi. ✧<sup>5</sup> Di, atou miling tuvava tei xa be malohos, ngan xa ilaxat rute xil vus te ut etan itel xeihen nan. E tuvava ak, melele xa milingi, lapo rati e langguri ba visal Hi e ba lalingi dotan e von xeihen nan xa eilep. ✧<sup>6</sup> Atou ak milesae ba be uruvuol, ba be rute xa Hi misak mesen ni tuei tangan ha ita en. E rute ak, ilaxat kuhi ituxoh melengien taosen tei handred lu e hanutap tol mun (1,260).<sup>‡</sup> ✧

<sup>7</sup> Di, e ut nesao, vaeen tei mistal. Vatixar Maekel del masxaxa nan xil labae del Dragon ak del masxaxa nan xil. ✧<sup>8</sup> Maekel del nan xil, labas tan ni xeihen na Dragon del masxaxa nan xil, e latamaen xil ti mun tangan lati e ut nesao. <sup>9</sup> Reitin, Dragon ak xa eilep, ngan xa tehe tetiamu ✧ xa latekesi ni Temat mu Setan, xil laso rati ra ut nesao. ✧ Ngan xa di miluvos moletin xil vus te ut etan, vatixar Maekel miso ni be ut etan del masxaxa nan xil vus.

<sup>10</sup> Di, nalong rae nggo ut nesao xa mikei nggeih bit,  
 “!Xosali, Hi miteh meulien e moletin nan xil del xeihen nan!  
 !Xosali, Hi pisen xeihen nan e bemei etan tangan valaxat xil!  
 Xosali, xi miling xeihen xa eilep de he Mesaea xa xi tehosei.

Vengan ngan xa misoh pe met Hi nar,

---

✧ 12:3: Dan 7:7 ✧ 12:4: Dan 8:10 ✧ 12:5: Aes 7:14; 66:7; Sam 2:9; Rev 19:15 ‡ 12:6: Melengien 1,260 be huraam 3 1/2. ✧ 12:6: Rev 11:2; 13:5 ✧ 12:7: Dan 10:13,21; 12:1; Siud 1:9 ✧ 12:9: Sen 3:1 ✧ 12:9: Sen 3:14-15; Aes 14:12-15; Luk 10:18; Sion 12:31; Rev 20:2

ngan xa di misep xar ni his moletin nar xil melengien  
e vongien, ☆

xosali, laso rati tuei ra ut nesao.

<sup>11</sup> Moletin nar xil labae lali Temat  
vengan xa laling neketen nae e ngan xa ren teleh  
texoni sulut sipsip tei te sanien eo,  
e latave unoun ti tangan lavit usil reitinen teni mi  
moletin sav xil.

Xil lamaen xoteh meulien nae tangan lakila lisoh ixeih e  
neketen nae,  
tave ti neta xa amat ven.

<sup>12</sup> !Xamim vus xa mudi e ut nesao,  
muhesi xamim!

E, aue li, isa mi xamim xa mudi e ut etan e tas,  
vengan Temat be tan visal xamim e ut etan.

Xi polu ni ekaten,

vengan xa mikila xa melengien nan xil be tamure  
sutang.”

<sup>13</sup> Melele xa Dragon tepus kila xa lateso rati tehe ut  
etan, xi minggol atou xa teling tutut tuvava tei. <sup>14</sup> E atou  
ak, Hi pol ni aveou vevaxum lu xa mahulong lustal lunggo  
tenben. Del aveoun xalu, xi ba de rute tei e uruvuol xa  
lalaxat kuhi huram tol (3) e aveti tei e he sav mun (6).  
E rute ak xi mikila vaxus ra Dragon ak. ☆ <sup>15</sup> Di, Dragon  
mei miluh rat oei holu xa mei be oeisal tei e mileh nggusil  
atou ak tangan vahuri vaha. <sup>16</sup> E tan dutou ni atou ak  
nggo sexien xa masel be rin lu e mu sen oei xa mistal  
nggo vulongge Dragon. <sup>17</sup> Melele xa pusi mak, Dragon ien  
nggat pupu ni atou ak. Misak ni, ba bit vapol ni vaeen  
vatel horamue nan xil: ngan xil xa di lalong xat rae na Hi  
e di labithiten reitinen usil Iesu mi moletin sav xil. ☆ <sup>18</sup> E  
Dragon ba misoh de suhon te tas.

---

☆ 12:10: Siob 1:9-11; Sak 3:1    ☆ 12:14: Dan 7:25; 12:7    ☆ 12:17: Dan  
7:7,21; Rev 11:7; 13:7

## 13

*Vongoro tesa lu lustal*

<sup>1</sup> Di, napus vongoro tesa tei xa mea ra tas. Vatin be lu e he sav (7) e hon xil be he xalu (10) xa vatluvoluv te lelaxatien xil di e hon he xalu (10) xil vus. E vatin xil vus langgur xat his tellep xil xa latekan ni ra Hi tengan mei vahe nae. ✧ <sup>2</sup> Vongoro tesa nen ak, napus tenben nggoni tenbe leopard, len xil nggoni le bear, e vulongen nggoni vulonge laeon. Mi vongoro tesa ak, Dragon misa xeihen, von xeihen nan, e maen ni tengan valaxat holesok holu. ✧ <sup>3</sup> Vongoro ak, neta tei nggul vatin tei xa lapusi xos imat ven. E melele xa mei meul bos rilomun, moletin xil te rute xil vus e ut etan latemanin ni e langgusil xati. ✧ <sup>4</sup> Ngan xil vus ak, lamot mi Dragon vengan xa xi misa xeihen nan xa nggeih pupu mi vongoro tesa ak. E lamot mi vongoro tesa mun labit, “?Visi iaxa nggur xeihen nggoni? ?Visi iaxa mikila vavae vatela? !Moletin tovuoll!”

<sup>5</sup> Hi maen vongoro tesa ak tengan vasep koai vahiteni xa xeihen nan pipin ni xeihen na Hi. Hi maen ni mun tengan vahur xeihen tengan valaxat rute xil vus e ut etan aveti hanutap lu e lu mun (42).\* ✧ <sup>6</sup> Xi misepsisil Hi, misepin misa ba xat hisen e rute xa da en, e misep purun ngan xil mun xa ladi e ut nesao. <sup>7</sup> E Hi maen ni mun tengan ivae itel moletin nan xil iha vuma ... ihas tan ni xil. Reitin, Hi maen vongoro tesa ak tengan vahur xeihen vali vatimol savsav xil vus, vali hisit moletin savsav xil vus, vali sepinien savsav xil vus, e vali kantri savsav xil vus. ✧ <sup>8</sup> Moletin xil vus te ut etan limot mini. E ngan xil kestang xa ladis hisexil de Vanuvei te Meulien na ngan

---

✧ 13:1: Dan 7:3; Rev 17:3,7-12   ✧ 13:2: Dan 7:4-6   ✧ 13:3: Rev 17:8

\* 13:5: Aveti 42 be hram 3 1/2.   ✧ 13:5: Dan 7:8,20,25; 11:36; Rev 11:2;

12:6   ✧ 13:7: Dan 7:7,21; Rev 11:7; 12:17

xa temat texoni sulut sipsip tei te sanien eo, xil linamot ti mini. Hisexil, latetisi teti e Vanuvei te Meulien tetiamu nousav, e melele xa Hi tenapeas ni ut etan ti mu. ☆

<sup>9</sup> !Xosxa vurangemim di, muteong kuhi! <sup>10</sup> Xosxa Hi miling xati tangan lital xat moletin tei, litela iha e lital xati vari. E xosxa Hi miling xati tangan litil vin moletin tei ni tiei te vaeen, ma litil vini vari. Misak ni, Hi di misis moletin nan xil tangan lixulehi lisoh ixeih e neketen nae. ☆

<sup>11</sup> Di, napas vongoro tesa teimun xa mea ra tan. Hon lu nggoni ho sipsip, e sepinien nan nggeih nggoni Dragon. <sup>12</sup> Vongoro tesa ak milaxat holesok xil e rin na ngan xa diamu. E nggeih xat moletin xil xa ladi e ut etan tangan limot mi vongoro tesa xa diamu, ngan xa neta tei texula e temeul tehos rilomun. <sup>13</sup> Vongoro xa bemei dutou, xi pol ni merekel xil xa latellep nggoni misak ni upang nggo ut nesao bemei etan tangan moletin xil vus lakila lapusi. ☆ <sup>14</sup> Hi maen vongoro ak xa bemei dutou tangan ha ti iluvos moletin xil vus te ut etan ni merekel xil xa pol ni e rin na vongoro xa diamu. E vongoro ak miluvos moletin xil e misak ni xil lapol ni nanao xa lapusi nggoni vongoro xa latesal vini ni tiei te vaeen e temeul rilomun. Di, misis xil tangan lamerere ni. ☆ <sup>15</sup> Hi maen vongoro tesa xa dutou tangan vasak ni nanao na vongoro xa diamu tangan vasehseh e vameul. Misak ni, nanao ak mikila vasepin e vasa lepiesien te maten mi ngan xil xa latamot ti mini. ☆ <sup>16</sup> Vongoro xa dutou nggeih xat moletin xil vus tangan lihur simeleleen tei iti e hexil metu mu e valnaoxil: ngan xil xa latellep ba duxoh movotei xil tang, ngan xil xa

---

☆ 13:8: Eks 32:32,33; Sam 69:28; Dan 12:1; Plp 4:3; Rev 3:5; 17:8; 20:12,15; 21:27; Aes 53:7; Sion 1:29,36; Rev 5:6,12 ☆ 13:10: Ser 15:2; 43:11 ☆ 13:13: Mat 24:24; 2Tes 2:9; 1King 18:24-39 ☆ 13:14: Mat 24:24; 2Tes 2:9-10; Rev 19:20; Dut 13:2-4 ☆ 13:15: Dan 3:5-6

holesok nae holu ba duxoh hoeo xil, ngan xil xa vexil mase ba duxoh slev xil. <sup>17</sup> Moletin xa tahur ti simeleleen ak, xi misakras vaxal mu vapos ni neta. E simeleleen ak be his vongoro tesa xa diamu e be pupuluen te hisen. ☆ <sup>18</sup> Ngan xil xa iexil bei lave metisou linem kil koute te simeleleen ak, vengan ngan xil xa lakilakil kuhi likila lipol rat koute te pupuluen teni xa be vole usil moletin tei. Pupuluen te hisen be tei e he sav, tei e he sav, tei e he sav (666).

## 14

*Ngan xa nggoni sulut sipsip te sanien eo misoh de Vathu Saeon del moletin nan xil*

<sup>1</sup> Di, naketeh ba, e napusi xa ngan xa nggoni sulut sipsip di misoh de Vathu Saeon. E ngan xil xa di lasoh dela labe taosen handred tei hanutap lu e hat mun (144,000). Ngan xil ak langgur simeleleen de valnaoxil xa latetis his ngan xa nggoni sulut sipsip del his Tamen di en. ☆ <sup>2</sup> Di, nalong rae tei nggo ut nesao xa misel nggeih nggoni melele xa tahe xil di lamavul xat hat xil, mu nggoni melele xa veta mirum nggeih. E tangalen teni bos nggoni melele xa moletin xil lapilei ni harp nae xil. ☆ <sup>3</sup> Moletin taosen tei hanutap lu e hat mun (144,000) lamea lasoh pe met ngan xil xa ladi e ut nesao: ngan xa di dotan e von xeihen nan, neta hat (4) xa lameul ladi, del elda xil mun. Melele xa lasoh mak, di lakikei ni sisien hu tei xa be na moletin handred tei hanutap lu e hat mun (144,000) kestang xa Hi teteh meulien e xil ra ut etan. Moletin sav xil lasakras lakikei ni. ☆ <sup>4</sup> Ngan xil ak lamese tevi e latnapat ti vatel atou xil. Reitin, xil lapol ni nenemien nae tangan lihusil xat Hi kestang e linavituei ti natel atou tova. Langgusil xat

---

☆ 13:17: Rev 14:9,11; 16:2; 19:20; 20:4    ☆ 14:1: Rev 7:4; 14:3; Esek 9:4; Rev 3:12; 7:3    ☆ 14:2: Esek 1:24; 43:2; Rev 1:15; 19:6    ☆ 14:3: Sam 33:3; 40:3; 96:1; 98:1; 144:9; 149:1; Aes 42:10; Rev 5:9; 7:4; 14:1

ngan xa nggoni sulut sipsip te sanien eo e rute xil vus xa xi diamu ni xil en. Hi texal rat xil ra moletin sav xil te ut etan del re Iesu tangan mei lisoh pe met Hi e pe met ngan xa nggoni sulut sipsip tangan mei lixoni sanien eo te anien hu te naho xa iha mi xalu. <sup>5</sup> E meulien nae, latnaluvos ti moletin e sexien nae xil temese tevi. ✧

*Masxaxa tol latsa selxatien ba mi moletin xil te ut etan*

<sup>6</sup> Di, napas masxaxa tei xa di mingga e tilang hat. Xi nggur longeongen hos xa da vehakut e di bithiteni mi moletin xil vus te ut etan: ngan xil te vatimol xil vus, ngan xil te sepinien xil vus, ngan xil te kantri xil vus, e mi hisit moletin xil vus mun. <sup>7</sup> Xi di mikei be nesao bit, “!Mumerere ni Hi e mupet rat hisen xa be eilep mak mul Vengan melengien di bemei tangan xi mei ilepis rin na moletin xil vus. !Ma mumei mumot mi Hi xa tepeas ni ut nesao, ut etan, tas e oeisal xil vus!” ✧

<sup>8</sup> Dutou ni ngan ak, masxaxa xa be lu nen mingga e tilang hat e mikei bit, “!Taon xa mahulong xa lakesi ni Babilon\* mikiri lel! Hi misa pangasien te ekaten nan mi moletin xil teni vengan lasak ni moletin te kantri xil vus tangan lastokovein sexien hos xil e langgulil sexien tesa xil nggoni sexien na hoeaso tei xa misa uae mi moletin ngan tangan vapol vasa vatela.” ✧

<sup>9</sup> Dutou ni ngan ak, masxaxa xa be tol e xatel mingga e tilang hat nggulil ngan xalu xa lutetiamu, e xi mikei be nesao bit, “Xamim xa di mumot mi vongoro tesa xa diamu e mi nanao nan, e munggur simeleleen nan di

---

✧ 14:5: Sam 32:2; Aes 53:9; Sef 3:13      ✧ 14:7: Eks 20:11; Sam 146:6

\* 14:8: Babilon be sepinien xusus usil taon xa mahulong te hal Rom xa vatit kavmen xil ladi en.      ✧ 14:8: Aes 21:9; Ser 51:8; Rev 18:2; Ser 51:7; Rev 17:2; 18:3

e valnaomim mu e hemim, ☆ 10 xamim vari ti muhur pangasien te ekaten na Hi xa ixeih xa ixeih pupu. Hi iso xamim muhe upang te xeih e mulong pangas xamim en pe met masxaxa eo xil e pe met ngan xa nggoni sulut sipsip.

11 Reitin, xamim xa mumot mi vongoro tesa e nanao nan e munggur simeleleen te hisen, upang itit ni ngan taxa ti ia xamim iha vuma ... hoxalite teni ihe tovuol e eas teni mun navus ti vatova.” ☆

12 Mak, ma di nasel xat moletin xil na Hi xa lalong xat rae nan xil e di langgusil xat Iesu, bos xa lixulehi lisoh ixeih e neketen nae.

13 Di, nalong rae tei nggo ut nesao xa bit, “Utis sepinien ak: Xosali iha, tuxolxatien iti mi ngan xil xa limat ve neketen nae e Suv Iesu.” ☆

Ninin bit rilomun ni bit, “Reitin li. Xil lingel kuhi ra polien te xeih nae, e lihur huite xa ihos ve polien hos xil xa latepol ni.”

### *Iesu di milepis rin na moletin xil*

14 Di, naketeh ba, e napas momah tei xa mieh. E moletin tei di dotan en xa napusi nggoni Nat Moletin xa tenben nggoni moletin tei xa nggo ut nesao.† E vatin, vatluvoluv te lelatxatien xa be gol da en, e hen, xi di nggur xat huknaef tei xa mikan. ☆ 15 Di, masxaxa teimun mistal nggo Nim Eo e mikei nggeih ba mi ngan xa dotan de momah bit, “Uhur xat huknaef nam e upol itela, vengan xosali be melengien xa holesok xil vus te ut etan men kuhi, e melele ak pipin tangan uleh viton moletin xil teni e ulepis rin nae.” ☆

☆ 14:9: Rev 13:12-17; 14:11; 16:2; 19:20; 13:17; 20:4; Sam 75:8; Aes 51:17,22; Ser 25:15; Rev 15:7; 16:19; Sen 19:24; Sam 11:6; Esek 38:22; Rev 20:10; 21:18

☆ 14:11: Aes 34:10; Rev 19:3; 13:12-17; 14:9; 16:2; 19:20; 20:4 ☆ 14:13: Hib 4:10 † 14:14: Nat Moletin be ngan xa Dan 7:13 del Dan 10:5 di misep usili xa isak ni lelatxatien na Hi mei istal. ☆ 14:14: Dan 7:13 ☆ 14:15: Soel 3:13; Mat 13:39-40

<sup>16</sup> Di, ngan xa di dotan de momah mikuvun huknaef nan be ut etan, e mileh viton holesok xil vus xa ladi en.

<sup>17</sup> Di, napas masxaxa teimun mistal nggo Nim Eo te ut nesao, e xi mun nggur xat huknaef tei xa mikan. <sup>18</sup> Di, masxaxa teimun nggo visal hor te vokon eo, ngan xa di milaxat upang teni. Xi mikei nggeih ba mi masxaxa xa nggur xat huknaef xa mikan bit, “Moletin xil te ut etan mei lamen kuhi ve lepiesien. Langgoni huite te urvatiei te grep melele xa lamen kuhi tangan lata rat xil. Ma uhur xat huknaef nam e uta rat moletin xil ak imak.” <sup>19</sup> Misak ni, napasni xa masxaxa mikuvun huknaef nan e ut etan, e da rat huit grep xil ra vatite. Di, mileh viton xil e miso xil labe rute xa labekisi tangan sute vahe relingi xa be von pangasien te ekaten na Hi. ☆ <sup>20</sup> E huit grep xa be moletin xil ak, labekis xil tangan sute vahe reling xil e hale te taon te hal Serusalem. E ra nae mileh nggoni oeisal xa teviei duxoh kilomita handred tol (300 km) e huinep teni sangas duxoh mita lu (2 m).

## 15

*Masxaxa lu e he sav (7) lapo xat longpangasien kor xil tangan lisa ni ihe ut etan*

<sup>1</sup> Di, napas neta teimun xa eilep mistal nggo tilang hat xa misak ni nou di nanem usil koute teni. Napus masxaxa lu e he sav (7) xa di lapo xat longpangasien lu e he sav (7). Longpangasien xil ak labe longpangasien kor xil xa ipisen ni xa ekaten na Hi mei duxoh hoxalite teni. ☆

<sup>2</sup> Di, e ut nesao, napas rute ak nggoni melele xa tas mieh e mexal nggoni kilas, e di minehin nggoni ngan xa upang da en. Napus ngan xil xa latesoh texeih e latevae teli e vaeen te neketen tetel vongoro tesa xa diamu, tetel

---

☆ 14:19: Aes 63:3; Rev 19:15    ☆ 15:1: Lev 26:21; Rev 15:6

## Revelesen 15:3      42      Revelesen 15:8

nanao nan, e tetel pupuluen te hisen. Xil di lasoh sargas visal rute xa napus tan nen mahulong nggoni tas e mexal nggoni kilas, e lapo xat harp nae xil xa Hi tesa ni mi xil.  
<sup>3</sup> Xil lakikei ni sisien xa nggoni ngan xa Mosis, eloheoh na Hi, tekikei ni tetiamu. Lakikei mak tengan lapet rat his ngan xa nggoni sulut sipsip labit,

“Hi Suv te Xeihen,

holesok xil xa di opol ni be tellep e bos pupu. ✧

Obe suv toto te kantri xil vus,  
e sexien nam xil vus momal e be reitin.

<sup>4</sup> Moletin xil vus limerere ni xouk.  
Xil lipet rat hisom ihe nesao,  
vengan xouk kestang obe eo. ✧

Kantri xil vus limei e limot minuk,  
vengan xa lapus kila xa sexien nam xil momal tevi.”

<sup>5</sup> Dutou ni, naketeh be nesao, e vangit Nim Eo na Hi, e napusi xa ladinin rat kaliko xa dakoe xol ut eo te Nim Tavolin. ✧ <sup>6</sup> Masxaxa lu e he sav (7) lastal langgo en, e xil laleh xat longpangasien lu e he sav (7) tengan lisa ni mi moletin xil te ut etan. Xil lasing ni eising xil xa mieh xa lamese tevi e labos pupu, e lasoxolen kaliko xil da xol valhasexil xa kala nen nggoni gol. ✧ <sup>7</sup> Di, tei e neta hat (4) xa meul, misa kekes ni pesin xa bos xa lapol ni ni gol ba mi masxaxa xil vus xa labe lu e he sav (7). Pesin nen xil ak lapolu ni ekaten na Hi xa meul vehakut tang. ✧  
<sup>8</sup> Eas xa nggo minehinen te xeihen na Hi mei mise xat vangit Nim Eo. Misak ni, moletin ti tave vangite ba vuma

---

✧ 15:3 Eks 15:1; 15:11; Sam 92:5; 111:2; 139:14; Amos 3:13; 4:13; Rev 1:8; 4:8; 11:17; 16:7,14; 19:6,15; 21:22; Dut 32:4; Sam 145:17; Ser 10:10 ✧ 15:4 Ser 10:6-7; Sam 86:9; Mal 1:11 ✧ 15:5 Eks 38:21; 40:34 ✧ 15:6 Lev 26:21; Rev 15:1 ✧ 15:7 Sam 75:8; Aes 51:17,22; Ser 25:15; Rev 14:10; 16:19

... longpangasien lu e he sav (7) xa masxaxa lu e he sav (7) laleh xati mei laduxoh hoxalite teni. ☆

## 16

*Masxaxa xil lateh rat pesin te longpangasien xil te ekaten na Hi ba xat moletin xil te ut etan*

<sup>1</sup> Di, nalong rae tei xa nggeih di misepin nggo Nim Eo ba mi masxaxa lu e he sav (7) bit, “Muha muteh rat pesin ihe lu e he sav (7) te longpangasien te ekaten na Hi ihe ut etan.” ☆

<sup>2</sup> Misak ni, masxaxa xa diamu ni xil ba miteh longpangasien xa di e pesin nan be ut etan. Ngan ak misak ni utua tesa xil lastal e ngan xil xa langgur simeleleen na vongoro tesa e lamot mi nanao nan. E xil lalong pangas xil holu xa holu pupu ven. ☆

<sup>3</sup> Di, masxaxa xa be lu (2) e xil miteh longpangasien xa di e pesin nan be tas, ma tas mei nggoni hatura na moletin xa mat. Ngan ak misak ni holesok xil vus xa lameul ladi e tas lalel. ☆

<sup>4</sup> Di, masxaxa xa be tol (3) e xil miteh longpangasien xa di e pesin nan be oeisal xil e vangoei xil. Misak ni oei xil vus ak biles mei be ra. ☆ <sup>5</sup> E nalong masxaxa xa di milaxat oei xil te ut etan bit,

“Hi xa obe eo,

oda xosali e oteta tetiamu,

lepisien xil ak xa di opol ni momal tang. ☆

<sup>6</sup> Moletin xil ak latesak ni re moletin nam xil tetel provet xil teleh. ☆

---

☆ 15:8: Eks 40:34; 1King 8:10-11; 2Kron 5:13-14; Aes 6:4; Esek 44:4 ☆ 16:1: Aes 66:6; Rev 16:7; Sam 69:24; Ser 10:25; Esek 22:31; Sef 3:8 ☆ 16:2: Eks 9:10; Dut 28:35; Rev 13:12-17; 14:9,11; 19:20; 20:4 ☆ 16:3: Eks 7:17-21 ☆ 16:4: Eks 7:19-24; Sam 78:44 ☆ 16:5: Sam 119:137; 145:17; Dut 32:4; Eks 3:14; Rev 1:4,8; 11:17 ☆ 16:6: Sam 79:3; Aes 49:26

Ma xoux di osa ra mi xil tangan limu ni.  
Nggo rin ak, di osa xoles naha xa latepol ni mi xil.”

<sup>7</sup> Di, nalang rae tei nggo hor te vokon eo xa bit,  
“!Hi Suv te Xeihen!<sup>☆</sup>

!Reitin li, lepisien nam xil be reitin e momal tevi!”

<sup>8</sup> Di, masxaxa xa be hat (4) e xil miteh longpangasien xa di e pesin nan ba xat meteneai. Misak ni, meteneai mei mitin nggeih xa nggeih pupu e ngga purun tenbe moletin xil del upang teni. <sup>9</sup> Meteneai ngga purun xil del titinen teni xa nggeih pupu. E neta sav xa mak, moletin xil lataviles ti ra tesaen nae xil, e latasa merereen mi Hi ti xa be eilep pupu. E-e, xil lasepsisil ba xat his ngan xa xeihen te longpangasien xil ak de hen. ☆

<sup>10</sup> Di, masxaxa xa be lim (5) e xil miteh longpangasien xa di e pesin nan ba xat von xeihen na vongoro tesa xa diamu. Misak ni, maluxoluken mei mikutaxol ut xil vus xa xi di milaxati. Moletin xil langas luhexil ve longpangasien xil xa di langguri. ☆ <sup>11</sup> Ma lasepsisil ba xat Hi te ut nesao ve longpangasien e utua tesa nae xil. E xil lataviles ti vari ra sexien tesa nae xil. ☆

<sup>12</sup> Di, masxaxa xa be tei e he sav (6) e xil miteh longpangasien xa di e pesin nan be oeisal Upretis xa eilep. Misak ni oeisal nen ak bemei mes e misa suse mi suv toto xil xa ladi e kantri xa ba ni ist tangan moletin te vaeen nae xil lakila lakakao en lava. ☆ <sup>13</sup> Di, napus ninin tesa tol (3) xa lapus xatel latnggoni frog. Xatel kekes, tei mistal nggo vulonge Dragon, tei mistal nggo vulonge vongoro tesa, e tei mistal nggo vulonge provet te luvosen nan. <sup>14</sup> Frog xatel ak latbe ninin tesa xatel xa di latopol ni merekel

---

☆ 16:7: Amos 3:13; 4:13; Rev 1:8; 4:8; 11:17; 15:3; 16:14; 19:6,15; 21:22; Sam 19:9; 119:137; Rev 19:2 ☆ 16:9: Rev 9:20-21; 16:11,21 ☆ 16:10: Eks 10:21; Aes 8:22 ☆ 16:11: Rev 9:20-21; 16:9,21 ☆ 16:12: Aes 11:15; 44:27; Ser 50:38; 51:36

xil xa tellep. Ninin tesa xatel ak latbe visal suv toto xil vus te ut etan tangan latileh viton xil lihe rute tei takes. Lamei vituei tangan lisak mesen xil ve vaeen xa eilep xa ite Melengien te Lepisien na Hi te Xeihen. ☆ 15-16 Xil limei vituei e rute xa lakesi ni ‘Armagedon’ nggo sepinien Hibru.

Melele xa di napusi, Suv Iesu biteni bit, “!Muteong kuhi! Inou di namei nggoni moletin te kanen tei e melele xa xamim munakil ti. ☆ E tuxolxatien na Hi iti mi ngan xa tit iketeh e tit isak mesen xi vehakut ve mei rilomunen navan. Xi ixoni moletin xa di miketeh kuhi e mising pipin tangan nave unoun ti xa takavue xol xi ti xosxa itemanin ni neta tei e vongien.”

<sup>17</sup> Di, masxaxa xa be lu e he sav (7) e xil miteh longpangasien xa di e pesin nan be mesavuol. Melele xa pol ni mak, rae te xeih tei mikei nggo von xeihen xa de Nim Eo bit, “!Bus tuei!” ☆ <sup>18</sup> E melele nen ak vari, an milangas, veta mirum e posou, e lul xa eilep milil. Lul ak minggeih mili sen lul sav xil xa latestal e melele xa Hi teling moletin xil e ut etan duxoh xosali. ☆ <sup>19</sup> Misak ni, tan te taon xa eilep te hal Babilon\* mesel be rin tol (3), e taon xil xa latellep te kantri xil vus lakiri lel. Hi pol ni mak vengan xa minem xat tesaen xil na ngan xil te taon xa eilep te hal Babilon, e misa pangasien te ekaten nan xa eilep ba xat xil. ☆ <sup>20</sup> Melele xa lul milil nggeih mak, aelan xil vus lamerir labe huinep te tas e vathu xil vus lakiri lel mei labe tovuol

---

☆ 16:14: Rev 19:19; Amos 3:13; 4:13; Rev 1:8; 4:8; 11:17; 15:3; 16:7; 19:6,15; 21:22 ☆ 16:15-16: Mat 24:43-44; Luk 12:39-40; 1Tes 5:2,4; 2Pit 3:10; Rev 3:3 ☆ 16:17: Aes 66:6; Rev 16:1 ☆ 16:18: Eks 19:16-19; Rev 4:5; 8:5; 11:19; Dan 12:1 \* 16:19: Babilon be sepinien xusus usil taon xa mahulong te hal Rom xa vatit kavmen xil ladi en. ☆ 16:19: Sam 75:8; Aes 51:17,22; Ser 25:15; Rev 14:10; 15:7

tang. ☆ 21 Merut aes xil xa latellep lakiri langgo tilang hat xa kilo te xil kekes duxoh hanutap lu (40). Melele xa aes xil ak lakiri mak, longpangasien teni nggeih xa nggeih pupu, ma moletin xil labiles e di lasepsisil Hi ven. ☆

## 17

### *Hi milepis rin na hoeaso Babilon\**

<sup>1</sup> Di, tei e masxaxa lu e he sav (7) xa latepo pesin lu e he sav (7) bemei visal nou e bit, “Amei, nipisen ni minuk itep iaxa Hi ilepis rin na hoeaso xa eilep. Xi be taon tei xa eilep xa lakili ni de visal oaisal xil holu. ☆ <sup>2</sup> Suv toto xil te ut etan latepol ni sexien tesa tetela, e moletin xil te ut etan mun latehur sexien te hoeasoen nan texoni ngan xa lamu uauen man teha vuma ... mei latetalang ni.” ☆

<sup>3</sup> Melele xa misepin minou bus. Ninin Eo mei mise xat inou, e masxaxa ak nggur nou nabe uruvuol tei. E rute ak, napus atou tei xa di dotan e vongoro tesa xa diamu. Tenben pipili, e vatin be lu e he sav (7) xa hon xil he xalu (10) ladi e xil. E ladis his tellep xil xa lakan ni ra Hi mei labe nan mikapis xol tenben. ☆ <sup>4</sup> Atou nen ak mising ni eising na eilep xil xa be pepol e pipili. Misoxolen gol, hat tehos xil xa laminehin kuhi, del valit vatiei xil te tas xa bos. Di hen, xi di nggur xat kap tei xa be gol xa polu ni holesok xil xa mumu e be muis, xa labe huit hoeasoen nan xil. ☆ <sup>5</sup> E valnaon, ladis his xuxus tei xa koute teni mak, “Ngan ak Babilon xa eilep, nine hoeaso xil vus e vatit sexien tesa xil te ut etan.” <sup>6</sup> Atou nen ak di misak ni moletin sav xil di lamu vin moletin xil na Hi e ngan xil xa di labithiten

---

☆ 16:20: Rev 6:14; 20:11    ☆ 16:21: Eks 9:24; Rev 11:19; 16:9,11    \* 17:: Babilon be sepinien xuxus usil taon xa mahulong te hal Rom.    ☆ 17:1: Ser 51:13; Rev 17:15    ☆ 17:2: Aes 23:17; Ser 51:7; Rev 14:8; 18:3    ☆ 17:3: Rev 13:1; 17:7-12    ☆ 17:4: Esek 28:13; Rev 18:16; Ser 51:7

reيتين usil Iesu. E napusi xa atou ak mitalang ni rexil nggoni ngan xa mitalang ni uae. E melele xa napusi, natemanin pupu ni. ✧

<sup>7</sup> E masxaxa misis nou bit, “?Otemanin veneh? Inou nihit lelen koute te nenemien xuxus usil atou ak itel vongoro ak xa xi di dotan en xa vatin lu e he sav (7) xa hon he xalu (10) da en. <sup>8</sup> Vongoro xa opusi, xi teta tetiamu, tara ti mun xosali ak, e nave nousav ti, ti imea reling Vangavul xa hoxalite teni tovuol. Ti, litela iha e lihu vini. Moletin xil te ut etan xa hisexil latnatisi ti vati e Vanuvei te Meulien tetiamu e melele xa Hi tepeas ni ut etan, xil litemanin ni vongoro ak. Reitin, xil litemanin melele xa lipusi xa vongoro ak teta tetiamu, tara ti mun xosali, e imei istal mun e melele xa ti imei. ✧

<sup>9</sup> “Koute te metuveen ak mei imese kuhi mi ngan xil xa nenemien te metisouen di e xil. Vatin lu e he sav (7) na vongoro ak be vathu lu e he sav xa atou ak di dotan en.† Vatin lu e he sav (7) ak, koute teimun be suv toto lu e he sav (7). <sup>10</sup> Suv toto lim (5) e xil lakesae ngamu, tei di milaxat ut xosali, e ngan xa be kor e xil, xi tamei ti mu. Melele xa imei, Hi imaen ni ilaxat ut nave nousav ti. <sup>11</sup> E rin te vongoro tesa, ngan xa teta tetiamu e tara ti mun xosali, xi mun be suv toto xa be tol e he sav (8) e xil. E suv toto ak be tei e suv toto lu e he sav (7) tetiamu, e Hi itela iha e ihu vini.

<sup>12</sup> “Hon he xalu (10) xa opusi, xil labe suv toto xil xa latahur ti mu lelatatien nae. Xil lihur xeihen te lelatatien nae te haoa tei takes tangan lilaxat ut xil te ut etan itel vongoro tesa. ✧ <sup>13</sup> Suv toto he xalu (10) nen ak, nenemien nae ihe tei takes tangan limaen xeihen te lelatatien nae

---

✧ 17:6: Rev 18:24; 19:2 ✧ 17:8: Dan 7:3; Rev 11:7; 13:1; Eks 32:32,33; Sam 69:28; Dan 12:1; Plp 4:3; Rev 3:5; 13:8; 20:12,15; 21:27 † 17:9: Taon te hal Rom, latekili ni tetotan tete vathu lu e he sav (7). ✧ 17:12: Dan 7:24

mi vongoro tesa. <sup>14</sup> Xil ha livae itel ngan xa nggoni sulut sipsip te sanien eo itel ngan xil xa mikes xil e bosei xil tangan lihusili vehakut. Xi ihas tan ni vongoro tesa ak itel ngan xil xa di langgusili. Ihas tan ni xil vengan xa xi be Suv Toto xa mili sen suv toto sav xil, e xi be Vat mili sen vat sav xil.” ☆

<sup>15</sup> Masxaxa biteni mun minou bit, “Oeisal xil xa opus atou xa be hoeaso di dotan en, xil labe vole usil moletin xil xa langgo hisit moletin savsav xil, langgo vatimol savsav xil, langgo kantri savsav xil, e langgo sepinien savsav xil te ut etan. <sup>16</sup> Hon he xalu (10) del vongoro xa otepusi, xil mei iexil ti iat hoeaso ak. Xil mei lileh rerat holesok nan xil vus e listokovein ni ika hon tang iha. Reitin, xil lileh rerat sen holesok nan xil e lisa upang ia len ni. ☆ <sup>17</sup> Suv toto he xalu (10) nen ak, Hi miling nenemien nan di e xil tangan lisak ni sepinien nan mei istal ihe reitin ixo rin xa limaen xeihen te lelatatien nae mi vongoro tesa ituxoh melele xa lipol ni imak mi atou ak. <sup>18</sup> Atou xa otepusi xiak, taxeak xi be taon xa eilep xa nggur xeihen te lelatatien xa eilep mak mu e suv toto xil vus te ut etan ladi pe hen.”

## 18

*Hi misak ni holesok xa ladi e taon te hal Babilon\* lakiri lel*

<sup>1</sup> Dutou ni ngan ak, napus masxaxa teimun xa bemei etan nggo ut nesao. Lelatatien nan mahulong e minehinen te xeihen nan mileluv mikapis e ut xil vus te ut etan.

<sup>2</sup> Xi mikei be nesao bit,

“!Hi misak ni taon xa eilep te hal Babilon mikiri lel! ☆

!Xi mikiri lel vari!

---

☆ 17:14: Dut 10:17; Dan 2:47; 1Tim 6:15; Rev 19:16    ☆ 17:16: Lev 21:9; Rev 18:8    \* 18:: Babilon be sepinien xusus usil taon xa mahulong te hal Rom xa vatit kavmen xil ladi en.    ☆ 18:2: Aes 21:9; Ser 51:8; Rev 14:8; Aes 13:21; 34:11; Ser 50:39

Moletin xil teni lihe tovuol mun.

Vontoen xil teni imei ihe von xusen na temat xil e ninin  
tesa xil tang.

Tuman tesa xil kestang ha ti lixus en.

<sup>3</sup> Taon xa eilep xiak bisu ni ekaten na Hi mak vengan xa  
sexien nan nggoni atou xa be hoeaso,  
xa milihni nenemien na moletin xil te kantri xil vus  
tengan mei lipol isa itela.

Reitin, taon ak di ihur pangasien vengan xa pol misa del  
suv toto xil holu te ut etan,  
e vengan xa nggal holesok holu xa eheien nan di en  
ra moletin te posen xil holu te ut etan, ma misak  
ni mani nae be holu ven.”☆

<sup>4</sup> Di, nalong rae tesav teimun nggo ut nesao bit,  
“!Moletin navan xil mumea! !Mumea rani!  
!Munavituei ti natel tesaen nan xil!  
!Muxouxou kuhi tangan munahur ti longpangasien  
natela!☆

<sup>5</sup> Vengan tesaen nan xil mitihu ba duxoh ut nesao,  
e Hi minem xat sexien nan xil xa mikavui.☆

<sup>6</sup> Mupol ni mini ixoni ngan xa xi tepol ni mi xamim.  
Musa xoles longpangasien mini ihe valu ve naha xa  
xi tepol ni mi xamim.

Kap te longpangasien xa xi tesa ni mi xamim tangan  
mumu ni,  
mutah uae te longpangasien iha en xa xeihen teni  
ihe valu tangan xi sung imu ni.☆

<sup>7</sup> Musa longpangasien ihe eilep mini e mupol ni ilonge isa  
ihe holu.

Reitin, mupol ni imak ipin ni his xa eilep xa xi tehuri  
e holesok xil holu te ut etan xa xi mitihu ni ve xi  
tasen.

---

☆ 18:3: Aes 23:17; Ser 51:7; Rev 14:8; 17:2    ☆ 18:4: Aes 48:20; 52:11; Ser  
50:8; 51:6,9,45; 2Kor 6:17    ☆ 18:5: Sen 18:20-21; Ser 51:9    ☆ 18:6: Sam  
137:8; Ser 50:15,29; 2Tes 1:6

Vengan xi misep koai mi xi tasen bit,  
 ‘Inou nabe Kwin xa eilep xa lelatien navan mahulong.

Natave tunau tei ti e nasakras nalonge vasa.’<sup>☆</sup>

<sup>8</sup> Ve sepinien te koaien nan,  
 longpangasien xil mei ipurun ni e ihu vini e melengien tei takes: <sup>☆</sup>  
 xi ihisu ni mesien, tangen, e mae kekaten.

Upang mei ia len ni,  
 vengau xa Hi Suv xa di milepis rin nan,  
 xeiheu nan mahulong.”

<sup>9</sup> Suv toto xil latepol ni sexien tesa tetela e latepus hosien tetela ve holesok xil te ut etan xa tehuri. E melele xa xil lipus eas te upang xa di ngga len ni, litesi e simetexil ikiri. <sup>☆</sup> <sup>10</sup> Xil lisoh sotin vengau xa ulixil ikan tengau linahur ti pangasien natela. Xil lihit, “!Aue li, misa xa misa pupu mi taon xa eilep te hal Babilon! Neta sav xa xeiheu nan mahulong, e nggur sen longpangasien te lepisien nan e haou tei takes.” <sup>☆</sup>

<sup>11</sup> Moletin te posen xil holu te ut etan, xil mun litesi e simetexil ikiri, vengau moletin ti mun naxal holesok ra xil. <sup>12</sup> Reitin, moletin ti mun naxal neta xil xa lapol ni ni gol, silva, hat xa minehin, e valit vatiei xil te tas xa bos xa bos. ?Reitin, visi mun ixal eising hos xil xa mieh, pipili, e pepol del eising xa bos xa lakesi ni silk? Ihe tovuol. E moletin ti mun naxal neta xil xa lapol ni ni liei xil xa bos, ni luh vongoro xil, ni aean xa lakesi ni brons, e ni hat xa lakesi ni marbel. <sup>☆</sup> <sup>13</sup> Neta xil xa di misak ni anien von mikon bos nggoni sinamon, e vokon xil xa nggoni mir e forangkansen liti nga tang. Anien xil xa langgoni uau,

---

<sup>☆</sup> 18:7: Aes 47:7-9    <sup>☆</sup> 18:8: Rev 17:16; Ser 50:34    <sup>☆</sup> 18:9: Esek 26:16; 27:30-35    <sup>☆</sup> 18:10: Esek 26:17; Dan 4:30    <sup>☆</sup> 18:12: Esek 27:12,13,22

oel, pulaoa e uit, linapos ni ti mun. Moletin ti mun naxal vongoro sae xil nggoni buluk, sipsip, e hos natel kat teni. Moletin tovuol tangan vaxal rat meulien na moletin xil tangan mei vahe slev nae xil. <sup>14</sup> Moletin xil xa di lapos ni holesok xil lihiteni iha mini lihit, “Holesok xil xa bos xa iem bei tangan uhuri lakesae relinguk. E holesok xil xa otepolu ni tetiamu tetel holesok xil xa tesak ni xouk di otesep koai ven, xil latetasil ranuk xosal, e onakamet ti mun.”

<sup>15</sup> Ngan xil ak langgur mani holu nggo holesok xil xa xi texale ra xil, melele xa lapus longpangasien na Babilon, lasoh ladi nga sotin vengan ulixil mikan xa linahur ti longpangasien natela. Xil lamuis e ladang labit, ☆

<sup>16</sup> “!Aue li, ngan ak misa xa misa pupu!

Tetiamu, taon xa eilep te hal Babilon teting ni eising xil xa tehos xa tehos xa temieh, tepili e tehe pepol.

Tetiamu, xi tesoxolen gol, hat xil xa minehin, e valit vatiei xil xa tehos xa tehos. ☆

<sup>17</sup> !E mapusi xa holesok nan xil vus lakesae relingi e haoa tei takes!” ☆

Melele xa vatihos xil te tuturil, boskru xil, moletin xil xa ladi en, e moletin sav xil xa lakamet meulien nae e tas lapusi, xil lasoh ladi nga sotin. <sup>18</sup> Melele xa lapus eas te upang xa di ngga len taon ak, lamuis nggeih e labit, “!Aue li, taon sav tovuol mun vaxoni taon xa eilep xiak!”

☆ <sup>19</sup> Ma, xil laso vulmeas be vatixil tangan vapisen ni xa lalonge misa holu, simetexil mikiri e ladesi labit, ☆

“!Aue li, ngan ak misa xa misa pupu!

Tetiamu taon xa eilep te hal Babilon teleh neta holu texo tuturil xil, e moletin xil te tuturil latehur mani holu texo en.

---

☆ 18:15: Esek 27:36    ☆ 18:16: Esek 28:13; Rev 17:4    ☆ 18:17: Esek 27:27-29    ☆ 18:18: Esek 27:32    ☆ 18:19: Esek 27:30-34

IE haoa tei takes, langgu len ni vari!”

<sup>20</sup> Di, nalong rae tei xa bit, ☆

“!Xamim te ut nesao,  
muhesi xamim vengan xa langgu len taon xa eilep  
xiak!

Xamim moletin xil na Hi, eloheoh xil, e provet xil mun,  
mulonge ihos,  
vengan xa Hi misa pangasien te lepisien nan mini ve  
sexien tesa xil xa xi tepol ni mi xamim.”

<sup>21</sup> Di, napus vatixar tei na masxaxa xil bemei e po rat  
vatihat tei xa meas pupu e miso ni be tas. Melele xa pol ni  
biteni bit,

“Usil rin tak, Hi ipo rat taon xa eilep te hal Babilon  
e iso ni ihe etan,  
e linapus ti mun moletin xil en. ☆

<sup>22</sup> E taon ak, linalong ti mun  
rumen te harp, flut, hon mu rae moletin en.

Ngan xil xa di labol, mu laseh liei, mu lapen ni neta,  
linapus ti mun xil en.

Tangalen na ngan xil xa di labas utut uit mei be pulaoa,  
linalong ti mun. ☆

<sup>23</sup> Laet napili ti mun en.

E taon ak, rumen te sien e melele xa tiramue miteli del  
atou tei,

linalong ti mun. ☆

Tetiamu, moletin xil xa di latepos ni holesok xil en,  
xil mei latehe eilep mak mu e ut xil vus te ut etan.

E del sexien te vongou nan,  
xi miluvos moletin xil vus te ut etan.”

---

☆ 18:20: Dut 32:43; Sam 96:11; Aes 44:23; 49:13; Ser 51:48 ☆ 18:21: Ser  
51:63-64; Esek 26:21 ☆ 18:22: Aes 24:8; Esek 26:13 ☆ 18:23: Ser 7:34;  
16:9; 25:10; Aes 23:8; 47:9

<sup>24</sup> Hi misa pangasien te lepiesien nan mi taon te hal Babilon ak vengan xa mikamet re provet xil e re moletin nan xil en. Reitin, xi pusi xa Babilon tehas vin moletin xil holu xa latexo ut xil vus te ut etan. ☆

## 19

*Ngan xil te ut nesao lames Hi ve pangasien xa misa ni mi taon te hal Babilon*

<sup>1</sup> Dutou ni ngan ak, nalong tangalen tei xa mahulong nggo ut nesao xa nggoni vanut moletin tei xa mahulong xa lakei be nesao labit,

“!Memesien ba mi Hi!

!Xi kestang di miteh meulien, e minehinen te xeihen nan mahulong pupu!

<sup>2</sup> Lepiesien nan xil be reitin e momal. ☆

Xi misa pangasien ba mi hoeaso

xa tepurun ut etan tetel sexien tesa nan xil.

Reitin, Hi misa xoles longpangasien mini

vengan xa xi tehu vin moletin te polien nan xil.”☆

<sup>3</sup> Xil lakei be nesao vatei mun labit,

“!Memesien ba mi Hi!

Vengan xa xi tesak ni eas te upang xa di ngga len taon xa eilep xiak ve sexien tesa nan xil

tengan ihe nesao vehakut xa vehakut tang.”☆

<sup>4</sup> Elda hanutap tei e hat mun (24) e neta hat (4) xa lameul ladi lamot mi Hi xa dotan de von xeihen nan. ☆ Xil labiteni labit,

“!Reitin! !Memesien ba mi Hi!”

---

☆ 18:24: Ser 51:49; Esek 24:7; Rev 6:10; 17:6; 19:2 ☆ 19:2: Sam 19:9; 119:137; Rev 16:7 ☆ 19:2: Dut 32:43; 2King 9:7; Sam 79:10; Rev 6:10 ☆ 19:3: Aes 34:10 ☆ 19:4: 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2,9; 5:1,7,13; 6:16; 7:10,15; 21:5

*Moletin xil na Hi labesi xil ve tetelien na ngan xa nggoni sulut sipsip te sanien eo*

<sup>5</sup> Di, nalong rae tei xa di misepin nggo visal von xeihen na Hi xa biteni bit,

“!Xamim xa di mupol mi Hi nar, mumesi!

!Xamim xa mumerere ni,

ngan xil xa latellep ba duxol ngan xil xa latereli, mumesi!” ☆

<sup>6</sup> Di, nalong tangalen tei xa mahulong nggo ut nesao xa nggoni vanut moletin tei xa mahulong. Xil lakei nggeih nggoni melele xa tahe xa eilep di miti hat xil mu nggoni melele xa veta di posou nggeih. ☆ Nalong xil di lakei be nesao labit,

“!Memesien ba mi Hi!

Vengan Hi nar xa be Hi Suv te Xeihen,

xi be suv toto xa di milaxat holesok xil vus. ☆

<sup>7</sup> !Ma rihesi xir e ripet rat hisen!

Rimes ngan xa minehinen te xeihen nan mahulong.

Rimesi vengan xa melengien te tetelien na ngan xa nggoni sulut sipsip di bemei,

e atou nan misak mesen xi ven.

<sup>8</sup> Mi atou nan, lasa eising hos tei xa mieh e minehin vengan memese mak mu.” ☆

(Eising ak be sexien hos xil na moletin xil na Hi.)

<sup>9</sup> Di, masxaxa biteni minou bit, “Utis sepinien ak: Tuxolxatien na Hi iti mi ngan xil xa lasilasil ni xil tengan lave anien te tetelien na ngan xa nggoni sulut sipsip.” E masxaxa bit rilomun ni minou bit, “Ngan ak be sepinien te reitinen na Hi.” ☆

---

☆ 19:5: Sam 22:23; 134:1; 135:1; 115:13; Rev 11:18 ☆ 19:6: Esek 1:24; 43:2; Rev 1:15; 14:2 ☆ 19:6: Esek 1:24; 43:2; Rev 1:15; 14:2; Eks 15:18; Sam 22:28; 93:1; 97:1; 99:1; Dan 7:14; Sak 14:9; Rev 11:15 ☆ 19:8: Aes 61:10 ☆ 19:9: Mat 22:2-3; Luk 14:15

<sup>10</sup> Melele xa biteni mak inou natingeiril e namot nabe tan visal len. E xi biteni minou bit, “!Onapol ni ti namak! Inou mun nabe ngan xa di napol mi Hi nggoni xouk e nggoni tumali xil xa lake reitin e sepinien usil Iesu. ! Umot mi Hi kestang! Vengan reitinen usil Iesu be vatite te sepinien xa provet xil latehit lelen ni texo Ninin na Hi.”  
✧

*Ngan xa miloh e hos xa mieh bemei e bas tan ni moletin tesa xil*

<sup>11</sup> Di, napus puiteh te ut nesao misaha, e natemanin xa napus hos tei xa mieh di mistal nggo en. E ngan xa di miloh en be xi xa lakesi ni ‘Reitinen e Vatit Nenesien.’ Del sexien xa momal, xi di milepis rin na moletin xil, e di bae del elu nan xil. ✧ <sup>12</sup> Meten minehin nggoni upang, e vatluvoluv te lelatatien holu di e vatin. Ladis his tei xa eilep pupu da en xa mosav xil latakil ti, xi kestang mikil koute teni. ✧ <sup>13</sup> E hisen teimun be ‘Vatit Sepinien na Hi.’ E ra ba xat rin xil vus te eising te mieh xa mising ni. ✧ <sup>14</sup> Moletin xil te vaeen te ut nesao langgusili. Xil mun di laloh e hos xil xa lamieh e lasing ni eising xa mieh xa memese kuhi. <sup>15</sup> Tiei xa mikan mistal nggo vulongen, e di bas tan vuol ni moletin tesa xil e kantri xil dela. Lelatatien nan ixeh e ileh viton moletin tesa xil tangan ihu lelen xil e ipisen ni xa ekaten na Hi te Xeihen mahulong ba xat xil ve sexien tesa nae xil. Ipol ni mi xil ixoni melele xa labekis huit grep xil tangan sute valeh vaxo en. ✧ <sup>16</sup> Latetis his tei

---

✧ 19:10: Pol 10:25-26; Rev 22:8-9 ✧ 19:11: Esek 1:1; Rev 4:1; Sak 1:8; 6:3,6; Rev 6:2; 1:5; 3:14; Sam 96:13; 11:4 ✧ 19:12: Dan 10:6; Rev 1:14; 2:17-18 ✧ 19:13: Aes 63:1-3; Sion 1:1,14 ✧ 19:15: Aes 49:2; Rev 1:16; 2:12,16; Sam 2:9; Rev 12:5; Aes 63:3; Tang 1:15; Soel 3:13; Rev 14:20; Amos 3:13; 4:13; Rev 1:8; 4:8; 11:17; 15:3; 16:7,14; 19:6; 21:22

tete eising nan xa teviei e tete marlen mun xa tehit, “Ngan ak Suv Toto na suv toto sav xil, e Vat na vat sav xil.” ☆

<sup>17</sup> Di, napus masxaxa tei xa di misoh de meteneai. Xi mikei nggeih ba ni tuman xil vus xa di langga e tilang hat bit, “!Mumei! !Mumei vituei ve anien xa eilep na Hi! ☆

<sup>18</sup> Mumei e mua tiei na suv toto xil, na vat xil te vaeen, na moletin te vaeen nae xil, na hos xil e na moletin xil mun xa di laloh en. Mumei e mua tiei na moletin xil vus ak: ngan xil xa vexil memase ba duxoh ngan xil xa labe slev, ngan xil xa latellep ba duxoh ngan xil xa latereli.”

<sup>19</sup> Di, napus vongoro tesa xa testal ra tas tetiamu, xi bemei vituei del suv toto xil te ut etan, e del moletin te vaeen nae xil mun. Xil lamei vituei tengang lavae vatel Iesu xa di miloh e hos nan e vatel moletin nan xil mun. ☆ <sup>20</sup> Xi dal xat vongoro tesa del provet te luvosen nan xa tepol ni merikel xil pe met vongoro ak. Del merikel nae lateluvos ngan xil xa latehur simeleleen na vongoro e ngan xil mun xa latemot mi nanao nan. Iesu miso te meul ni xalu lube upang xa eilep xa di pili vehakut nggoni vulut upang te venu. ☆ <sup>21</sup> Di, Iesu, xa miloh e hos nan, bas vin moletin te vaeen xil vus na vongoro ak del tiei xa mistal nggo vulongen. E tuman xil lamei langga vin xil ni tiei na moletin xil ak. ☆

## 20

### *Moletin xil na Hi lalaxat ut etan huram taosen tei (1000)*

<sup>1</sup> Di, napus masxaxa tei bemei nggo ut nesao, e xi nggur xat ki te Vangavul xa hoxalite teni tovuol de hen del sen tei xa meas e eilep pupu. <sup>2</sup> ☆ Xi dal xat Dragon xa eilep, tetal tetiamu xa lakesi ni Temat mu Setan, e bar xati ni sen

---

☆ 19:16: Dut 10:17; Dan 2:47; 1Tim 6:15; Rev 17:14 ☆ 19:17: Esek 39:17-20  
 ☆ 19:19: Sam 2:2 ☆ 19:20: Rev 13:7,12-17; 14:9,11; 16:2; 20:4,10,15; Aes 30:33 ☆ 19:21: Esek 39:17,20 ☆ 20:2: Sen 3:1

ak da duxoh huram taosen tei (1000). ☆ <sup>3</sup> Reitin, masxaxa miso ni be vangavul ak, mikoe xol puiteh teni, e milok xole nggeih. Pol ni mak tangan Temat misakras mun valuvos moletin xil te kantri xil ituxoh melele xa huram taosen tei (1000) mei itavi. E itutou ni huram xil ak, Hi imaen ni ha ven imase rilomun ihe vuteili tang. ☆

<sup>4</sup> Di, napas moletin xil ladotan ladi e von xeihen nae xil e Hi maen xil lalepis rin na moletin xil. Napus ngan xil mun xa, tetiamu, lateta xoteh vatixil vengang xa latehithiten reitinen usil Iesu e sepinien na Hi. Reitin, ngan xil ak latnamot ti mi vongoro tesa mu nanao nan, e latnahur ti simeleleen nan tenati e valnaoxil mu e hexil. Napus ngan xil ak lamea rilomun ra maten e lameul lalaxat ut etan nggoni suv toto xil del Iesu Kristo huram taosen tei (1000). ☆ <sup>5</sup> Ngan ak be mea rilomunen xa diamu. Moletin sav xil xa lalel limea rilomun itutou e melele xa huram taosen tei (1000) mei itavi. <sup>6</sup> ☆ Tuxolxatien na Hi iti mi ngan xil xa Hi bosei xil tangan limea ra maten e mea rilomunen xa diamu, e xil linamat ti mun e maten xa be lu nen xa be te nousav. Xil lihe pris eo xil na Hi e na Iesu Kristo, e lilaxat rute xil vus itel Iesu huram taosen tei (1000). ☆

### *Laso Temat be Von Upang*

<sup>7</sup> Melele xa huram taosen tei (1000) mei itavi, Hi imaen Temat ha ven imase ra nim te xeih nan. <sup>8</sup> E xi iha iluvos moletin xil te kantri xil iha ituxoh rin xil vus te ut etan, e likes xil ixo vole tei lihit langgoni Gog e Magog tetiamu. Temat ileh viton xil limei e rute tei takes tangan livae e rin nan, e xil mei lihe holu xa holu pupu ixoni suvien xil te tas xil vus te ut etan. ☆ <sup>9</sup> Xil mei likakao xol ut xil vus

---

☆ 20:2: Rev 12:9    ☆ 20:3: 2Pit 2:4; Siud 1:6    ☆ 20:4: Dan 7:9,22,27;  
 Luk 22:30; 1Kor 6:2; Rev 13:17; 14:9,11; 16:2; 19:20    ☆ 20:6: Rev 20:14; 21:8  
 ☆ 20:6: Eks 19:6; Aes 61:6; 1Pit 2:5,9; Rev 1:6; 5:10    ☆ 20:8: Esek 7:2; 38:2

e ti likapis xol rute xa moletin xil na Hi di lapol ni horao mae xil en e likapis xol Serusalem, taon xa eheien nan di en. E Hi isak ni upang ixo ut nesao e ia len xil. ☆ <sup>10</sup> Ti, Temat xa di muluvos xil, Hi isak ni liso ni ihe Upang xa eilep xa nggoni upang te venu, rute xa lateso vongoro e provet te luvosen nan luteha en ngamu. E rute ak, upang ia xil melengien e vongien, e lilong pangas xil vehakut xa vehakut tang. ☆

*Melengien te lepisien bemei*

<sup>11</sup> ☆ Di, napas von xeihen te mieh tei xa eilep, e napas ngan xa dotan en. Ut etan e tilang hat nesao lulesae relingi, e lube tovuol mun vari. ☆ <sup>12</sup> E napas moletin xil vus xa lalel ngamu mei lasoh sangas ni von xeihen ak, ngan xil xa latellep ba duxoh ngan xil xa latereli. Di, napusi xa lalang vanuvei xil xa ladis xat sexien xil vus na moletin xil kekes di en. ☆ E lalang vanuvei teimun, Vanuvei te Meulien, xa ladis xat his moletin xil en xa lihur meulien sal. ☆ Di, Hi milepis rin na ngan xil xa latemat nggusil sexien nae xil xa latetis xati teti en, e misa naha xa momal mi xil kekes. <sup>13</sup> Tas misa rat ngan xil xa lalel en. E maten e Hedis, xalu mun lusa rat ngan xil xa lalel ladi e xalu. Reitin, ngan xil vus xa lamat, Hi milepis rin nae nggusil naha xa xil latepol ni. ☆ <sup>14</sup> Di, Maten e Hedis, Hi misak ni laso xalu lube Upang xa be maten xa be lu nen xa be te nousav. ☆ <sup>15</sup> Melele xa labuli Vanuvei te Meulien xa latetis xat his moletin xil xa lihur meulien sal teti en,

☆ 20:9: 2King 1:10; Esek 38:22; 39:6 ☆ 20:10: Aes 30:33; Rev 19:20; 20:15;

Sen 19:24; Sam 11:6; Esek 38:22; Rev 21:8 ☆ 20:11: Dan 7:9-10; Mat 25:31-46

☆ 20:11: Sam 114:3,7 ☆ 20:12: Sam 28:4; 62:12; Pro 24:12; Aes 59:18; Ser 17:10; Rom 2:6; 1Kor 3:8; 2Kor 11:15; 2Tim 4:14; 1Pit 1:17; Rev 2:23; 18:6; 22:12

☆ 20:12: Eks 32:32,33; Sam 69:28; Dan 12:1; Plp 4:3; Rev 3:5; 13:8; 17:8; 20:15;

21:27 ☆ 20:13: Rev 1:18 ☆ 20:14: 1Kor 15:26,55

ngan xil xa latakamet his nae ti vati en, laso xil labe Upang  
nen ak.✠

## 21

### *Ut etan e tilang hat mei lube neta hu*

<sup>1</sup> Di, napusi xa ut etan e tilang hat mei lube neta hu, e  
ut etan e tilang hat tetiamu lutekesae, e tas tovuol mun.

✠ <sup>2</sup> E napusi xa taon te hal Serusalem mun mei be neta  
hu. Reitin, taon eo ak mei mistal nggo visal Hi e ut nesao,  
e bemei etan. Taon ak bos xa bos e napusi nggoni atou  
xa mising bos pupu ve tetelien nan tangan vaha vapus  
tiramue nan. ✠ <sup>3</sup> Di, nalong rae tei xa nggeih misepin  
nggo von xeihen na Hi bit,

“!Xosali, tim sa Hi  
de vis moletin xil te ut etan!  
Xi ite visal xil,  
e xil lihe moletin nan xil.  
Hi vari iaxa iti mi xil,  
e ihe Hi nae.✠

<sup>4</sup> Xi isihi simetexil ra metexil. ✠  
Maten e tangen ihe tovuol,  
isien e longpangasien ivus vari.

Vengan sexien xil tetiamu te longpangasien e maten,  
linapus ti mun.”✠

<sup>5</sup> Di, ngan xa dotan de von xeihen xa eilep biteni bit,  
“Mupusi. Xosali, di napol ni holesok xil mei be neta hu.”  
Di, xi biteni mun minou bit, “Utis sepinien ak, vengan xa  
sepinien xil ak be reitin e moletin xil likila liling nenesien

---

✠ 20:15: Aes 30:33; Mat 25:41; Rev 19:20; 20:10; 21:8; Eks 32:32,33; Sam 69:28;  
Dan 12:1; Plp 4:3; Rev 3:5; 13:8; 17:8; 20:12; 21:27 ✠ 21:1: Aes 65:17; 66:22;  
2Pit 3:13 ✠ 21:2: Aes 52:1; Rev 3:12; Aes 61:10; Hib 11:10,16 ✠ 21:3:  
Lev 26:11-12; 2Kron 6:18; Esek 37:27; Sak 2:10; 2Kor 6:16 ✠ 21:4: Aes 25:8;  
Rev 7:17 ✠ 21:4: Aes 35:10; 65:19

nae iti en.” ✧ <sup>6</sup> E xi biteni bit, “!Bus tuei, napol vuol ni naha xa nateling xati! E holesok xil vus xa di, inou nateta tetiamu ni e ha nita itutou ni. Reitin, inou nabe vatite teni, e nihe hoxalite teni mun. Mi ngan xil xa meruru nggat xil, inou nisa oei ixo vangoei te meulien sal mi xil ixoni sanien tang tangan limu ni. ✧ <sup>7</sup> Ngan xil xa latesoh texeih e vaeen te neketen, xil lihur holesok xil ak ra nou tangan ihe nae vehakut. E inou nihe Hi nae e xil lihe horamue navan xil. ✧ <sup>8</sup> E rin na ngan xil xa labe vat ulikanen, ngan xil xa labiles ra Iesu, ngan xil xa langgusil sexien xil te ut etan, ngan xil xa labas vin moletin, ngan xil xa lapol ni sexien te hoeasoen xil, ngan xil xa lapol ni eimas, ngan xil xa lamot mi nanao xil, e ngan xil xa labe vat luvosen xil; ngan xil vus ak lihe Upang xa di pili vehakut nggoni upang te venu. Ngan ak be maten xa be lu nen xa ita vehakut tang.” ✧

*Serusalem mei be neta hu e bemei e ut etan*

<sup>9</sup> Di, napas tei e masxaxa lu e he sav (7) xa latepo xat pesin lu e he sav (7) te longpangasien kor xil. Xi bemei e biteni minou bit, “Amei, e nipisen ni minuk atou xa iteli itel ngan xa nggoni sulut sipsip.” <sup>10</sup> Di, Ninin na Hi mei mise xat inou e masxaxa nggur nou mabe nesao e hu tei xa mahulong. E rute ak, xi pisen Serusalem hu minou xa be taon eo na Hi. E napusi xa nggo visal Hi e ut nesao e di bemei e ut etan. ✧ <sup>11</sup> Minehinen te xeihen na Hi di en. Reitin, napas minehinen teni nggoni hat hos tei xa laet di mileluv en, nggoni saspaxa mexal nggoni kilas. ✧ <sup>12</sup> Vioh

---

✧ 21:5: 1King 22:19; 2Kron 18:18; Sam 47:8; Aes 6:1; Esek 1:26-27; Rev 4:2,9; 5:1,7,13; 6:16; 7:10,15; 19:4; 2Kor 5:17 ✧ 21:6: Rev 1:8; 22:13; Aes 44:6; 48:12; Rev 1:17; 22:13; Aes 55:1; Sion 7:37; Rev 22:17; Sam 36:9; Ser 2:13 ✧ 21:7: 2Saml 7:14 ✧ 21:8: Aes 30:33; Mat 25:41; Rev 19:20; 20:10,15; Sen 19:24; Sam 11:6; Esek 38:22; Rev 19:20 ✧ 21:10: Esek 40:2 ✧ 21:11: Aes 60:1,2,19

te taon eilep pupu e teviei be nesao. Puiteh teni xil labe lu e le tei (12) e masxaxa lu e le tei (12) laketeh xol xil. Nesao e puiteh xil ak ladis his vatimol lu e le tei (12) na mol-Isrel xil di en. ✧ <sup>13</sup> Puiteh tol ladi e rin xil vus: tol e rin xa be ist, tol e rin xa be saot, tol e rin xa be not, e tol e rin xa be wes. <sup>14</sup> Vioh te taon ak, vatite teni be hat xil xa mahulong lu e le tei (12), e ladis his eloheoh lu e le tei (12) na ngan xa nggoni sulut sipsip di e xil.

<sup>15</sup> Masxaxa xa misepin minou nggur liei tei xa be gol xa mikila ivuli mita xil ni. Ma napusi xa xi ba e buli mita xil te taon ak, del mita te puiteh e vioh xil mun teni. ✧ <sup>16</sup> Taon ak, rin xil vus teni pipin, e pipin mun ni ngan xa teviei be nesao. Melele xa masxaxa buli, mikameti xa teviei teni be stedia\* taosen lu e le tei (12,000). ✧ <sup>17</sup> Di, masxaxa buli mita te vioh teni e mikameti xa ien duxoh kiubit† hundred tei hanutap lu e hat mun (144). Melele xa masxaxa buli mita te holesok nen xil ak, xi di nggusil sexien te pupuluen na moletin xil te ut etan. <sup>18</sup> Vioh te taon ak, lapol ni ni hat hos xa minehin kuhi, ngan xa lakesi ni saspa. E taon xati, lapol ni ni gol xa memese xa minehin kuhi nggoni kilas e melele xa eai di mileluv en. <sup>19</sup> Vatit vioh te taon ak, lapol ni ni hisit hat hos xil holu: ngan xa diamu (1) be saspa, ngan xa be lu (2) nen be safaea, e ngan xa be tol (3) e xil be akat. E nesao nen, ngan xa be hat (4) e xil be emeral. ✧ <sup>20</sup> Ngan xa be lim (5) e xil be onikis, e ngan xa be tei e he sav (6) e xil be kanilian. Di, ngan xa be lu e he sav (7) e xil be krisolaet, ngan xa be tol he sav (8) e xil be beril, e ngan xa be hat he sav (9) e xil be topas. E nesao nen, ngan xa

---

✧ 21:12: Eks 28:21; Esek 48:30-35 ✧ 21:15: Esek 40:3,5 \* 21:16: Stedia tei nggoni teviei te stadium xa eilep te futbol. E 12,000 stedia pipin ni 2,400 kilomita. ✧ 21:16: Esek 48:16,17 † 21:17: Kiubit tei nggoni teviei te huhen ba duxoh vakuhen. E 144 kiubit pipin ni 60 mita. ✧ 21:19: Aes 54:11-12

be he xalu (10) e xil be krisopres, ngan xa tei e le tei (11) e xil be takoes, e ngan xa be lu e le tei (12) e xil be ametis. <sup>21</sup> Puiteh lu e le tei (12) lapol kekes ni xil ni valit vatiei hos te tas tei, ngan xa mahulong e minehin pupu. E suse xil te taon be gol xa memese kuhi e di minehin kuhi nggoni kilas xa mexal.

<sup>22</sup> E melele xa naketeh mikapis e taon ak, natapus ti Nim Eo tova vata en, vengan xa Hi Suv te Xeihen e ngan xa nggoni sulut sipsip ludi e mesal, e moletin xil lakila lamot mi xalu e rute xil vus teni. ✧ <sup>23</sup> Taon ak, minehinen te xeihen na Hi kestang di mileluv en, e ngan xa nggoni sulut sipsip iaxa be miehen teni. Mak, ma moletin xil xa ladi en latanem pupu ni ti meteneai mu aveti. ✧

<sup>24</sup> Moletin xil te ut etan ti likakao e miehen nalu. E suv toto xil ti lileh holesok hos nae xil liha e taon ak tengan ti lisa ni mi Hi e ngan xa nggoni sulut sipsip. ✧ <sup>25</sup> Puiteh xil te taon ak lisaha vehakut. Linakoe xol xil ti vatova, vengan xa vongien ihe tovuol en. ✧ <sup>26</sup> Moletin xil te ut etan lileh holesok hos nae xil liha en tengan lisa ni mi Hi e mi ngan xa nggoni sulut sipsip. ✧ <sup>27</sup> E ngan xil xa lapol misa, laluvos, mu lapol ni holesok xil xa tamal ti mu tamese ti, xil lasakras lava en vengan xa vonexil ihe tovuol en. Vengan taon ak be na ngan xil kestang xa latetis hisexil teti e Vanuvei te Meulien na ngan xa nggoni sulut sipsip. E xil kestang lakila liha en e liti e taon ak. ✧

## 22

### *Oei te meulien*

---

✧ 21:22: Amos 3:13; 4:13; Rev 1:8; 4:8; 11:17; 15:3; 16:7,14; 19:6,15 ✧ 21:23: Aes 60:19-20; Rev 22:5 ✧ 21:24: Aes 60:3,5 ✧ 21:25: Aes 60:11; Sak 14:7; Rev 22:5 ✧ 21:26: Sam 72:10-11 ✧ 21:27: Aes 52:1; 1Kor 6:9-10; 2Pit 3:13; Rev 22:15; Eks 32:32,33; Sam 69:28; Dan 12:1; Plp 4:3; Rev 3:5; 13:8; 17:8; 20:12,15

<sup>1</sup> Di, masxaxa pisen ni minou oeisal xa oei te meulien di mileh en. Napusi xa mexal e minehin nggoni kilas xa eai di mileluv en, e di mileh nggo pe von xeihen xa be na Hi e na ngan xa nggoni sulut sipsip. ✧ <sup>2</sup> Oeisal ak mileh e hilaep te suse xa mahulong te taon ak. E seri oei xalu vus, vatiei xil lameul en xa huite xil teni di lasa meulien sal. Xil di laso huite e aveti lu e le tei (12) xil vus te haram xil vus. E ute xil mikila vatal rat mesien ra ngan xil xa langgo kantri xil vus. ✧ <sup>3</sup> E rute ak, halesil te tesaen napangei ti mun holesok xil xa ladi en. ✧

Von xeihen xa be na Hi e na ngan xa nggoni sulut sipsip iti e taon ak, e moletin te polien nan xil limot mini. <sup>4</sup> Xil lipus valnaon e simelelen xa hisen da en ite valnaoxil. ✧ <sup>5</sup> Vongien ihe tovuol, e moletin xil linanem ni ti mun usil laet mu eai, vengan xa Hi Suv ihe miehena. E ti lilaxat ut xil vus ixoni suv toto xil vehakut xa vehakut tang. ✧

### *Mei rilomunen na Iesu*

<sup>6</sup> Di, masxaxa biteni minou bit, “Sepinien xil ak be reitin e moletin xil likila liling nenesien nae iti en. Hi Suv xa misa Ninin nan mi provet xil, xi di misil masxaxa nan xil tangan lipisen ni mi moletin te polien nan xil neta xa mei istal navehi ti.” ✧

<sup>7</sup> Di, Iesu bit, “!Muteong kuhi! Nave nousav ti, inou nime. E tuxolxatien na Hi iti mi ngan xil xa lalong xat sepinien xa di nabit lelen ni nggo vanuvei ak usil naha xa mei istal.” ✧

<sup>8</sup> Inou, Sion, iaxa nalonge e napas holesok xil vus ak. E melele xa nalonge e napusi bus, natingeiril e namot pe le

---

✧ 22:1: Esek 47:1; Soel 3:18; Sak 14:8    ✧ 22:2: Sen 2:9; 3:22; Esek 47:12    ✧ 22:3: Sak 14:11    ✧ 22:4: Sam 17:15; 42:2; Mat 5:8; Rev 3:12  
 ✧ 22:5: Sak 14:7; Rev 21:25; Aes 60:19-20; Rev 21:23; Dan 7:18,27; Rev 5:10; 20:6    ✧ 22:6: Dan 2:28,29,45; Rev 1:1,19    ✧ 22:7: Rev 2:16; 3:11; 22:12,20

masxaxa xa pisen holesok xil ak minou. ☆ 9 E xi biteni minou bit, “!Onapol ni ti namak! Vengan inou mun nabe ngan te polien na Hi nggoni xouk, nggoni tua namim xil xa labe provet xil, e nggoni ngan xil vus xa di lalong xat sepinien xa di e vanuvei ak. !Momal tangan umot mi Hi keatang!”

10 Xi biteni mun minou bit, “Onasoson sepinien xil ti xa di e vanuvei ak usil naha xa ti imei vengan melengien bemei sangas tangan holesok xil ak mei istal ihe reitin.

☆ 11 Mak, ma ngan xil xa di lapol misa e sexien nae xil mikavui, lakila liti ni ngan taxa ti lipol ni holesok xil xa misa e mikavui. E ngan xil xa di lapol momal e meulien nae be eo, lakila litit ni ngan taxa ti lipol ni holesok xil xa momal e be eo.”

12 Di, Iesu bit, “!Muteong kuhi! Nave nousav ti inou nime. E mei nisa xolesi mi moletin xil kekes ihusil naha xa xi tepol ni. ☆ 13 E holesok xil vus xa di, inou nateta tetiamu ni e ha nita itutou ni. Reitin, inou natehe vatite teni, e nihe hoxalite teni mun.” ☆

14 Tuxolxatien na Hi iti mi ngan xil xa meulien nae memese tevi nggoni ngan taxa lakas moten eising nae. Hi imaen xil tangan mei lia huit vatiei xa di misa meulien sal. E xi imaen xil limei e vangit taon nan lixo puiteh teni tangan mei liti en vehakut. ☆ 15 E hale te taon ak, ngan xil xa di langgusil sexien xil te ut etan lati nga: ngan xil xa di lapol ni eimas, ngan xil xa di lapol ni sexien te hoeasoen, ngan xil xa labas vin moletin, ngan xil xa lamot mi hi sav xil, e ngan xil xa labe vat luvosen. ☆

---

☆ 22:8: Pol 10:25-26; Rev 19:10 ☆ 22:10: Dan 12:4; Rev 1:3 ☆ 22:12: Rev 2:16; 3:11; 22:7,20; Aes 40:10; 62:11; Sam 28:4; 62:12; Pro 24:12; Aes 59:18; Ser 17:10; Rom 2:6; 1Kor 3:8; 2Kor 11:15; 2Tim 4:14; 1Pit 1:17; Rev 2:23; 18:6; 20:13,14 ☆ 22:13: Rev 1:8; 21:6; Aes 44:6; 48:12; Rev 1:17; 2:8; 21:6 ☆ 22:14: Sen 2:9; 3:22; Esek 47:12; Rev 22:2,19 ☆ 22:15: 1Kor 6:9-10; Rev 21:8,27

<sup>16</sup> “Inou, Iesu xa nasa masxaxa navan tangan vahit mesen holesok xil ak minuk tangan uhit mesen ni iha mi sias xil vus. Inou iaxa nabe ngan xa provet xil latehit lelen ni latehit nimei nixo vatimol na suv toto Deved e nihur xeihen te lelatatien nan. ☆ Inou nabe Melan, hitu te makoe xa latehit lelen ni xa imei.” ☆

<sup>17</sup> Ninin na Hi e atou na ngan xa nggoni sulut sipsip di lukesi lubit, “!Amei!” ☆

E xamim vus xa di mulong sepinien xil ak, ti mukesi muhit, “!Amei!”

E mi xamim xa meruru di nggat xamim, xamim mumei. Io, mumei e mumu oei xa isa meulien sal mi xamim, vengang xa be sanien tei mi ngan xil vus xa iexil bei tangan lavuri.

### *Sepinien kor*

<sup>18</sup> Inou, Sion, di nasa selxatien tei xa nggeih mi xamim vus xa di mulong sepinien xil xa di vanuvei ak xa bit lelen ni usil naha xa ti imei. Xosxa moletin tova iling xat sepinien tova mun isorin ngan ak, ma Hi iling xat pangasien xil liti en ixoni ngan xa latesep usili e vanuvei ak. ☆ <sup>19</sup> E xosxa moletin tova ihur rat sepinien tova ihe reling vanuvei ak, ma Hi ihur rat voninen e ut nesao tangan naxa ti mun huit vatiei xa di misa meulien sal, e nava ti mun Taon Eo na Hi xa latesep usili e vanuvei ak. ☆

<sup>20</sup> Ngan xa di bit lelen sepinien ak biteni bit, “!Reitin, nave nousav ti, inou nimei!” ☆

!Io li, amei Suv Iesu!

<sup>21</sup> Nasis tangan eheien hos na Suv Iesu iti mi xamim vus xa mube moletin nan xil. Reitin.

---

☆ 22:16: Aes 11:1,10; Rom 1:3; Rev 5:5 ☆ 22:16: Nam 24:17; Rev 2:28  
 ☆ 22:17: Aes 55:1; Sion 7:37; Rev 21:6 ☆ 22:18: Dut 4:2; 12:32 ☆ 22:19:  
 Sen 2:9; 3:22; Esek 47:12; Rev 22:2,14 ☆ 22:20: Rev 2:16; 3:11; 22:7,12

Vanuvei Eo e sepinien Vatlongos na mol-Vatimol xil  
niutestamen e rute te oltestamen  
Portions of the Holy Bible in the Southeast Ambrym Language of  
Vanuatu  
Des portions de la Sainte Bible dans le Sud-Est Ambrym Langue de  
Vanuatu

copyright © 2015 Wycliffe Bible Translators, Inc.

Language: Southeast Ambrym (Ambrym, Southeast)

Dialect: Central

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-06

---

PDF generated using Haiola and XeLaTeX on 11 Mar 2022 from source files dated 11 Mar 2022

d6322831-f65b-57c1-8673-8099ea7771d7